



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>




This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.





8^o L. 322. ^a BS.

8^o L. 322. ^a BS.



George Frederick Nott.





The first part of the document discusses the importance of maintaining accurate records of all transactions. It emphasizes that every entry should be supported by a valid receipt or invoice. This ensures transparency and allows for easy verification of the data.

In the second section, the author outlines the various methods used to collect and analyze the data. This includes both primary and secondary data collection techniques. The analysis focuses on identifying trends and patterns over time, which is crucial for making informed decisions.

The third section provides a detailed breakdown of the results. It shows that there has been a significant increase in sales volume, particularly in the online channel. This is attributed to the implementation of the new marketing strategy and the improved user experience on the website.


Finally, the document concludes with a set of recommendations for future actions. It suggests continuing to invest in digital marketing and exploring new product lines to further drive growth. Regular monitoring and reporting will be essential to track the success of these initiatives.



COLLEZIONE

**DELLE MIGLIORI OPERE SCRITTE
IN DIALETTO VENEZIANO**

VOLUME XI:



POESIE

DI

AUTORI DIVERSI

VOLUME UNDECIMO




VENEZIA

AL NEGOZIO DI LIBRI ALL'APOLLO

M. DCCC. XVII.

Dalla Tipografia di Alvisopoli



P O È S I E

DELL' AB.

ANGELO MARIA BARBARO



NOTIZIE

INTORNO ALL' AB.

ANGELO MARIA BARBARO.

Quest' uomo di strano umore ebbe i natali il dì 9 febbrajo 1726 in Portogruaro da Bernardo Barbaro Patrizio Veneto, ch' ivi era allora Podestà, e da donna non nobile. Non potendo per le patrie Costituzioni venir ammesso al Maggior Consiglio egli indossò le vesti del Sacerdozio, al cui stato forse non avea la miglior propensione. Essendo stato educato alle lettere, e sortito avendo dalla natura un vivacissimo ingegno, si adoprò, e riuscì a migliorarsi i mezzi di sussistenza con uffizj affidatigli dal Governo, spendendo poi le ore di ozio tra le Muse, che gli prestavano spontanee i sali e

le grazie del patrio dialetto. Ogni novel-
 lizza narrata a un Caffè che di buon
 grado egli frequentava, ogni avvenimento
 cittadino aizzavano il suo prurito alla
 satira, e ne fan prova parecchie centina-
 ja di Madrigali stizzosi da esso indirizzati
 al suo caro amico Francesco Liarca Se-
 gretario del Senato, i quali si conserva-
 no, con altre sue Poesie, nella dovizio-
 sissima Collezione di patrie lautezze fatta
 dall' egregio Patrizio sig. Teodoro Correr.
 È famoso in Venezia un Dramma del no-
 stro Barbaro, intitolato *Anna Erizzo in
 Costantinopoli*, scritto nel dialetto Veneto
 con rarissima leggiadria, ma che non do-
 vrà mai pubblicarsi, campeggiandovi trop-
 po per entro la satira e l' indecenza. Lo
 stesso dire si può di altri suoi Componi-
 menti, fra quali a fatica si sono scelti que'
 pochi che in questo nostro Volume veggo-
 no ora per la prima volta la luce. Era-
 no all' autore familiari le mordaci rispo-
 ste ed i frizzi, ma sfuggitegli appena di

bocca ne sentiva egli stesso vivissimo dispiacere ; e parendogli d'essere per questa causa venuto in ira a' suoi concittadini non si fidava di camminare solitario durante la notte , e teneasi sempre a lato un fido e ben armato dimestico , per lo che non di rado gli avvenne d'essere arrestato e maltrattato dalla sbirraglia . Sul finire della sua mortale carriera egli diventò sordo talmente da non poter introdurre all' orecchio il suono della voce che per un tubo . Gracile e trascurato nei metodi di un buon regime non visse che anni 53 , e mancò in patria nel dì 23 marzo 1779 . Il Padre di lui erasi con buona riuscita esercitato nella Pbesia vernacola , e Fratello (ch'egli fu) di Cornelia Barbaro Gritti , e Zio materno di Francesco Gritti , s' è già veduto nel corso di questa Raccolta quanto tutto un tal parentado del poetare nel dialetto nostro riuscito sia benemerito .



RITRATTO DELL' AUTORE

SONETTO

Sordo e mez' orbo , con sie denti in boca ,
Con un muso da strissimo patio ,
Da l' omo trascurà , scordà da Dio ,
Senza una Dona che me svegia o toca ,

In una casa , anzi in una bicoca ,
Fornia da leterato e da sbasio ,
Co una massera da butar in Rio
Che 'l salario a magnar ciga e taroca ;

Co una Messa da prete Calabrese ,
Co un Patrimonio mezo rovinà ;
Co una pension de tre ducati al mese ;

Con un pare che pochi me ne dà ,
Con un Papa in furor co sto paese ,
Questo è il mio stato: oh sielo b...:

NOVELLA

Un Povereto co la barba longa
 Una volta xe andà
 A pregar un Barbier per carità
 Ch' el ghe fizza la barba:
 El Barbier con dispeto
 Ga dito al Povereto:
*Sentève su quel scagno
 Che farò sto vadagno .*
 Po el ga dito al Garzon:
*Tira fora quel strazzo de fazziol,
 Dame un fero ordinario ,
 Dame el cain , quello che xe pontà ,
 E dame quel saon che xe vanzà .*
 Sto gran anemalazzo
 L' à presto insaonà ,
 L' à prencipià a radarlo ,
 Overo a scortegarlo .
 In quel ponto se sente su la strada
 Un Can a gola averta
 Che cigava cain .
 Un galantomo che gera in botega:
Coss' è , l' à dito , cossa ga quel Can?
 Allora el Povereto
 El dise: *Ghe scometo
 Che a quel Can un Barbier cortese e pio
 Ghe fa la barba per amor de Dio .*

AD UNA SIGNORA

NEL DÌ DI MEZZA QUARESIMA

Signora , andè in Campagna
Scondève in Teraferma ,
Oh Dio ! no stè a Venezia ,
Tropo , tropo se' in vista ,
O almanco retirève su una Lista .
El Nunzio ve riceve ,
El Nunzio xe zentil e assae bonomo ;
El ve tien , el ve guarda
Co 'l sa la vostra colpa
E 'l pericolo somo .
Se in Venezia vu stè ;
No no , no la scampè ,
Ve lo aviso ; e predigo ;
(Nò disè che sia un strambo o pur un sbrega)
El popolo in tal dì ve ferma e siega .

AI CORRETTORI DELLA REPUBBLICA

Se tornasse a sto mondo
 E Licurgo e Solon,
 E tuti i sete Savj de la Grecia
 I resteria a la fè tanti cocali
 Volendo riformar ancuo Venezia!
 L'è andata sta Cità;
 Sta Repubblica alfin
 Più de tute à durà.
 Co l' abito xe vechio,
 Nol se rinova più,
 D' una velada se fa camisiola;
 De questa le braghese,
 (E in braghese, perdia, semo ridotti!)
 E quando le xe rote
 Se mete dei taconi,
 Se dà dei bei pontini
 Per no mostrar el cul e i halotini.
 De più no se pol far,
 Dio solo xe capace de crear.
 Co i vizj à sottomesso le virtù
 No gh' è rimedio più.
 La gola, el lusso, la lussuria e l' ozio
 Trionfa in sta Venezia,
 E a coregerla ben l' è una facezia.

Peraltro se volè, Legislatori
Zelanti de la Patria,
Se volè, mi ve dago
Un ricordo sicuro ma violento
Da farve sgargar, cavar i ochi.
Ecolo in bota qua:
Chiapè, tegni, sarè la Dona in casa,
La Dona, sì, la Dona,
La Dona à rebaltà
Le legi e le virtù de sta Cità.

IL CONCIERE DI TESTA

El concier de la Dona
 Ogni momento el cambia;
 Parigi ne dà el ton
 Per topè, per bandete e per cignon.
 Quel concier feminil
 Xe vario; ma el viril,
 Quello del Cavalier e del Mario
 No va avanti nè indrio;
 L'è costante, l'è quello;
 L'è quello che savè,
 L'è quello alfin, l'è quello de Moisé.

AL PREVOSTO DI SORISOLE

D O N A N T O N I O R U B B I

VENUTO IN CREDITO DI FAR MIRACOLI

O Don Antonio Rubi, Taumaturgo
 De Bergamo, agiutè
 Un Sordo che qua gh'è;
 Un Sordo cussì sordo; e tanto sordo
 Ch' ogni fedel creatura
 Che con lu parla rischia una rotura.

Da Sorisol voltève in ver Venezia;
 Benedì, ma de cuor,
 Sto Sordo secator,
 Fe' ch' el buta a la fin via la trombeta;
 Liberè sta Cità
 Da tanta maledeta sordità.

Canzon; overo *Oremus*,
 Va là, va dal Prevosto,
 Va ti, perchè sto Sordo
 No ga bezzi da far tanta gran strada;
 E quando ti è arivada,
 Con un cuor pien de speranza e ingordo
 Racomandaghe ben, ben ben, sto Sordo.

PER I MUSSATI ELETTI NOBILI VENEZIANI

SONETTO

Oh siestu maledeti sti Mussati!
 Butève là sul leto un pochetin,
 Apena chiapè sono, eco el violin,
 E po' la becadina su i cossati.

Sul muso, su la schena, senza pati
 I ve salta, e i ve torna con morhin;
 Ve dè dei sculazzoni da sassin;
 Se falè el colpo, i torna co sti ati.

C overzive pur quanto che volè,
 Chè se no i pol far altro i beca i panì
 E i ve ruza aciò el sono vu perdè;

Ma da qua avanti, stimo, che a sti cani
 Bisognerà che le ferie basè;
 Zentilomini i è fati Veneziani!

NOVELLA

Dal so Piovan xe andata un dì una Puta
 Vicina a farse sposa
 Acìò el ghe diga la Messa de Maria .
 El Piovan gh' à risposto : *A pian, sta cosa ;*
Qua bisogna parlarme schietamente
Come se fussi al Confessor presente ,
Se vu se' Puta
Le Madona ve agiuta ,
Ma se Puta no se'.
Drento l' ano crepè ;
Perchè po no suceda sta Tragedia
De la gran Madalena
Co la Messa in ancuo se ghe remedia ;
Parlè senza raziri
 La Puta qua ga trato dei sospiri ;
 E po l' à dito : *Sior Piovan la diga . . .*
La diga pur la Messa . . .
La Messa . . . de Maria . Oh Dio, che pena !
Ma con un poco de la Madalena .

PER L' ESTREMA MALATTIA
DEL PROCURATOR CALBO

Un Grego, vero citadin d' Atene,
 Benemerito assae de la so' Patria,
 In fin de la so' età
 Da savio el s' à tirà
 A finir la so' vita
 In t' un Casin de l' Atica campagna,
 Aspetando da forte al fin la morte.
 Dopo diversi ani
 D' una vita beata, un mal de peto
 L' à ridoto moriente. Intorno al leto
 Un dì l' aveva i Grandi de la Grecia,
 (Come che qua in Venezia
 Ga la Camera piena
 Dei talenti bronzini aristocratici
 Un nostro Senator
 Quando el sbotega, el mor,
 Ma un Senator de quei,
 De quei che un dì à fato
 Gran barufe in Senato,
 E che à parlà set' ore in un Pregai;
 Guadagnandose in Patria un' opinion
 De Demostene, Aristide, o Focion)
 Ora sto Grego invito

L' à dito: *Zito zito,*
Coleghi, amici cari,
Moro, ma prima ve lasso un Ricordo:
Moro contento e del mio fin son pago
Se scolpir lo farè ne l' Areopago.
El Ricordo xe questo:
 „ Quando che una Republica
 „ Sta ben quanto che basta
 „ No ghe tetè in tel cul che la se guasta“.

SOPRA IL FAMOSO BALLERINO PICH

ALL' AMICO LIARCA

Quando Roma pensava
 A un Mimo, a un Saltador, a un Istrion
 Roma allora l'andava a tombolon,
 E l'Impero in tochi, in pezzi, in stele.
 Venezia ancuo a le Stele
 Fanatica sublima el caro Pich.
 Caro Liarca mio, nu fermo crich!

STORIA TRATTA DA PLUTARCO

Sta matina mi ò leto
 Sul celebre Plutarco
 Una cosa che vedo
 Imitada in gran parte
 Sul stato de S. Marco.
 Lu dise , che Caton ,
 Omo severo , Senator giustissimo ,
 À imprestà la mugier pubblicamente
 Al Senator Ortensio , el qual smaniava
 De aver fioli da un fonte
 Degno de la Republica Romana ;
 De aver dei Fabii , dei Scipioni , e Regoli ,
 E no , come tra nu , certi petegoli .
 Da qualche tempo in qua
 In parte s' à introdoto
 Sto esempio in sta Cità .
 Se fa de le imprestanze ,
 O piutosto dei stochi e de le usure ,
 Perchè po' i fioli resta , o tristi , o boni
 Ai Siori Ortensi no , bensì ai Catoni .

ALL' AMICO LIARCA

Nel vastissimo Impero de la China,
Dove Legislator xe stà Confucio,
Questo à fato una Lege
Che in gran parte corege
Quel maledeto vizio che à la Dona
De presto o tardi far
I corni ne l'amar.
La vol, che quando una
Sia rea d' infedeltà
Subito a questa el naso sia taglià.
Se una tal Lege ancora
Fusse agionta al Statuto Venezian,
Disème, Liarca mio, fra tante e tante
Che sente o finge, ma che sempre ostenta
Le calde de l'amor gran smanie e pizze,
Quante e quante saria le nostre schizze?

IL MAL COSTUME IN VENEZIA

S O N E T T O

Sordo come che son ziro e spassiso
 Osservando el moral de sta Venezia.
 Più che 'l spirito vedo assae l'inezia;
 Più che saviezza vedo chiasso e riso;

Vedo l'omo d'onor squalido e sbriso;
 Vedo el doto giazzà più de la Svezia;
 Vedo patria e virtù tuto in facezia;
 Vedo Caton, ma lo vedo deriso;

Vedo qualche Lugrezia che consola;
 Vedo Livia e Pompea sempre afolada;
 E vedo quela col bel Silvio sola;

Vedo arti e comercio zo de strada;
 Vedo lusso, superbia, ozio e gola....
 Ah! Venezia d'un di dov' estu andada?

PER LA PRIMA COMPARSA AL BROGLIO NELL'ANNO
1778 DI DUE PATRIZI GIAMMARIA BALBI
MUSSA, E GIULIO ANTONIO MUSSATO

Oh co' bela, oh co' bela
 Combinazion propizia!
 Un Mussato e una Mussa
 In t' un istesso di
 A messo tuti do' veste patrizia!
 Chi ride e se sganazza,
 Chi fa bordelo in piazza,
 Altri vol che malsana
 Sta Dama Serenissima vechieta
 Tioga el late per questo de Musseta;
 Ma mi, che ò bon giudizio,
 Vedo 'l caso propizio
 De un' epoca gloriosa,
 Come quel de la Vaca
 Ch' è stà cambià in Europa belicosa;
 E come, dando 'l late
 A Romolo ed a Remo
 Una Lova salvadega
 Xe nassua la Republica Romana;
 Cussì un Musso e una Mussa
 Sempre più soderà
 Sta Republica nostra Veneziana.

AI CAVALIERI SERVENTI

APOLOGO

Plinio el Vechio raconta
 Che in Etiopia se trova
 Un gran bel Oselon,
 De pene tuto rosso
 E per questo el se chiama *Porfirion*.
 El dise, che st' Oselo
 Abia la proprietà
 De viver quanto dura
 De le Done la rara fedeltà.
 Quando Sposo in Etiopia uno se fa
 El compra un *Porfirion*,
 E 'l lo sera in t' un chebon,
 El ghe dà da magnar a crepa panza,
 E fin a tanto che vivo el lo vede
 Da la Mugier cucà lu nol se crede;
 Ma se morto el lo trova,
 El scana la Mugier, e a causa de l' Oselo
 Perfida el la dichiara e da bordelo.
 Plinio dise de più :
 Ch' in Etiopia anca el Cavalier Servente
 Se compra un *Porfirion*,

E sin che vivo el xe, lu serve e ama
 La bela Etiope soa graziosa dama;
 Ma se morto el lo vede,
 L' impianta la Signora,
 E l' inchioda el *Porfirion*
 De la Dama infedel soto el balcon.

Oh Damine!

Oh Damone!

Oh quanti *Porfirioni*

Che gaveressi ancuo soto i balconi!

IN MORTE DEL PROCURATOR TRON

U no dei gran portenti
 Che se pol dir del Tron
 Xe 'l dir, che 'l xe stà *Savio*,
 E *Savio* senza denti.
 Donca con gran razon
 Pianzèlo, o Citadini, e doti e gnochì,
 Che *Savj* senza denti ghe n'è pochi.

LAMENTO DELLE VENEZIANE

CONTRO LA PARTE DE' CORRETTORI ALLE POMPE

Ste Done xe in orgasmo, in confusion,
 Le ga un pipío grandissimo
 D' una reformazion
 Da la testa al fiancheto,
 Dai pie sìn al cignon.

Una stramba m' à dito :

„ Una Parte de pompe?
 „ Anca sta Parte qua ne seca e rompe?
 „ La barbarie d' un di torna in Cità;
 „ La go co' sti vechiazzi,
 „ Coi Catoni severi,
 „ Coi Fabi balonèri
 „ Che ne voria corète,
 „ Desmesse, convertie, anacorete.

„ I ne voria ridur e far tornar

„ In rede, co l'ovata, e forse in zocoli;
 „ I voria torne i cocoli,
 „ Sti Cavalieri bei tanto serventi
 „ Che per nu tira l' anema coi denti.

„ Po' i ne voria brusar i Santi Padri

„ Elvezio; Montesquieu, Voltaire, Rousseau,
 „ L' *Academie des Dames*,

„ E Ninon de Lenclos;
 „ I ne voria per fin
 „ Fiscar anca el Casin,
 „ Quel sito, oh Dio, ridoto al Rocombol
 „ Dove se dise e fa quel che se pol!
 „ I finirà po' col volerne in casa,
 „ Anzi anzi in cusina
 „ Co la lume da ogio
 „ A cuser canevazze,
 „ A taconar le veste e i gabanoni
 „ A sti novi Licurghi, a sti Soloni;
 „ E alora el sior Mario,
 „ Tornà alfin tiranèto,
 „ Obligarne vorà fin al lucheto.
 „ Oh Omo prepotente,
 „ Estu nato da nu
 „ Per nostra schiavitù?
 „ Ah la Dona meschina
 „ La se fa el so Neron come Agripina!
 Cussì la m' à parlà sta temeraria,
 Ma quel ch' à da morir prima savaria.

R I S P O S T A

AL LAMENTO DELLE VENEZIANE

Done, no ve dè pena,
 No ve metè in spavento
 Se fusse anca per vu zonto el momento
 De meterve in caena,
 O, a meglio dir, de meter la cavezza
 A tanta tracotanza e sfrenatezza.

No ve ramarichè,
 El mal no sarà grandò
 Come che vel pensè.
 Se sa che dei Catoni,
 Dei Fabi, dei Licurghi e dei Soloni
 Xe passà el tempo, e che 'l mondo moderno
 Se ride de quei mati e se fa scherno.
 Ancuo se vol che ben vestii se vaga,
 Sempre serae no se ve vol in casa,
 Molto manco in cusina
 A cuser canevazze,
 A taconar vestidi e gabanoni;
 Un pensar saria questo da minchioni.

El mondo tuto ve vorà carète,
 No convertie, desmesse e anacorete,
 Come senza rason andè sclamando;

No abiè timor de questo,
 A idee sì strambe dè un perpetuo bando,
 Quel che da nu se vol xe ben tut' altro;
 Metève in atenzion, e ve protesto
 De dirve el con e 'l ron tuto desteso
 Acio no possiè dir che no avè inteso.
Da vu altre se brama, che dai fianchi
 Ve sia stacà i Serventi,
 Perchè semo po' stanchi
 De veder la Cità piena a martelo
 De marii cornisai, b..... contenti;
 Se vol tronca el bordelo
 Dei vostri *Rendez-Vous*,
 Nè che i se fassa più.
 Xe savio el mondo e nol vol più sofrir
 Che una galanteria sia el vituperio,
 E un vezzo de la moda l' adulterio.
Cossa ve par, carine?
 Cossa me saveu dir?
 Qua lucheti no gh'è; no gh'è tirani,
 Nè se vol che stè in casa retirae
 E sempre condanae
 A laorar e a mastegar corone,
 Basta che più no fe le b..... e,
 Che i patrimonj no butè in sconquasso
 Coi bertoni, col ziogo e in darve spasso,
 Che de più no iritè la Tera e 'l Cielo
 Perchè abiamo a provar qualche flagelo.

MADRIGALE

PER LA VENUTA IN VENEZIA DI S. M. CESARBA

E DELLE AA. LL.

GLI ARCIDUCHI FRATELLI

O Venezia, garetolo d'Italia,
 A razon ti è superba
 Perchè in sen ti ti ga
 Tre Altezze, ma reali;
 E un Imperial Maestà!
 Xe vero che sti quatro
 Del Lorenese Austriaco illustre sangue
 I xe incogniti, e sconti
 Col titolo de Conti,
 Ma sta Contea xe tanto trasparente
 Che ognun vede 'l real, no l'aparente.
 I viasa come 'l Sol
 Da drio a una nuvoleta,
 Ma come quello sempre
 Se rileva al splendor,
 Cussi questi se mostra al mondo e a nu
 Co la gran dignità, co le virtù.
 Li vedo a ochio neto,
 E i capisso assae più co l'inteleto;

E se beato son̄
A vederli soltanto ;
Se podesse sentirli od Dio che incanto !
Alora ; amigo mio , te lo protesto
Beatissimo saria più de *Pio Sesto*.

LA MATRONA D' EFESO

NOVELLA

GIA' SCRITTA DA PETRONIO ARBITRO

*Dame, e vu che le Dame stimè tanto,
Per niente no badè a sta istorièla.
Petronio un dì l' à scrita (oh Dio che incanto!)
Mi l' ò tradota, ma lontan da quela
L' ò fata in Venezian col stil de Santo
Pagozzi; d' ela ridè, o pur strazzèla;
Ma dirò, e vel protesto, che se dà
Pur tropo in certe Dame sta onestà.*

Una Dama ghe gera a un tempo in Efeso
Tanto nota per fama d' onestà,
Che tute quante le mugier, le vedoe
De la Cità e de i lioghi vicini
A procession le andava a visitar
Sta Dama onesta, sto spechio, sto portento;
Sto onor, sta gloria, sta virtù del sesso.
A sta Dama de tanta castità
Ghe xe morto el Mario. Oh Dio che afano!

Un Mario, gran Mario de zornò e note;
 Un Mario Senator, un *Pater Patriae*.
 Sta Dama; appena vedoa, desperada,
 No la s' à contentà de seguitar
 El funeral come s' usava in Grecia.
 Con i cavei in t' i ochi e sgrendenada
 E col pestarse l' un e l' altro peto,
 Le coste, i fianchi, i zenochi, i pie;
 Ela à volesto ancora (oh gran amor!)
 Serarse in sepoltura col Mario;
 E là tut' el dì e la note destirada
 Sul morto la pianzeva el caro vivo.
 I so' parenti e quei de so' Mario,
 (El primo sangue de quela Cità;
 Ma sangue de lanzeta e latesin)
 I amighi tuti de le do' gran case,
 E fina i servi mossi a compassion,
 Tuti à tentà levarghe el genio mato
 De morir col Mario sepolta viva.
 Ma tuto in van! Infina i Senatori,
 I Terzi Loghi, i Zugegadi, i Cotimi
 Per distorla xe andai, e andai de bando:
 Sto gran esempio de l' amor del toro
 A comosso ogni cuor più duro e fiero;
 Tanto più che passà gera do' dì
 Che quela Dama zoso de la gola
 No avea mandà un sculiereto d' aqua,
 Nè un biscotin, nè gnanca un pignoleto,

A fianco de sta Dama squinternada
 Ghe gera sempre la so' Cameriera
 Che pianzeva, zigava e se strazzava
 Anch' ela el petarler, la cotoleta.
 De trato in trato sta serva sbasia
 Mocava el lume co 'l gavea la bronza;
 E quando el gera povereto d' ogio,
 L' ogio ghe remeteva, a ciò sto lume
 Continuo e vivo fusse in quel Sepolcro:
 Sta novità, sto caso cussi raro
 Gera l' istoria d' ogni casa e bozzolo,
 E ognùn diseva che mai più s' à visto
 In Mugier tanto amor, tanta onestà.

In quei zorni xe nato per comando
 Deì Signori de Note al Criminal,
 Che do' Sassini s' à impicà, e messe
 Le Forche in vicinanza del Sepolcro
 Dove stava serai come marmote
 El morto Senator, la Vedoà in pianto;
 E la Serva co l' ogio e la mocheta.
 Un Soldado de guardia xe stà messo
 In sentinela là da so' Zelenze
 Acìò i parenti de quei do' Picai
 No i vegnisse a robar i do' cadaveri
 Per dar fine ai corpi e a l' ignominia:
 Sto Soldado, pien d' ozio e de tristezza,
 Spazzisava su e ze co la so' pipa
 Quando a caso l' à visto, e restà atonito;

Un lume in t' un Sepolcro, e po' l' à inteso
 Sospiri e pianti de persone vive.
 Pien de curiosità, de compassion;
 (Proprietà de Natura) l' à volesto
 Presto saver chi mai ghe gera drento.
 A basso el s' à calà, e a pena vista
 Una Dona bellissima in quel liogo
 Lu xe restà un omo incocalio.
 In prima, per eror de fantasia,
 El l' à credesta un' ombra, una fantasma;
 Un mazzariol, un spirito-foleto;
 Ma dopo, incoragio, co' l' à osservà
 Un corpo morto destirà per tera
 E quella Dona viva in largo pianto
 Col viso sgrafignà tuto da l' ongie;
 Col peto sbafarà, e tula quanta
 Sbonigolada da la testa a i pie,
 Allora l' à capio e l' à deciso,
 Che la causa de tuto quel afano
 Gera la morte d' un caro Mario.

Presto, presto el Soldado de buon cuor
 L' è corso fera e l' è andà a tor el cesto
 De la so' cena e l' è tornà là drento.
 Subito l' à tentà in bona forma
 De redur quella Dama e quella Serva
 A lassar el dolor e a refziarse
 Con un poco de pan; ma più impegnà
 Gera el Soldado verso de la Dama,

(*Cognossuda per Dama, e de che pegola!
 Al viso, a l' andriè, al portamento*)
 Cussì lu gh' à parlà umanamente
 E pien de carità: *Dama, gran Dama;*
Lassè l' asano, la tristezza, el pianto
Per el morto Mario; perchè ve zura
Sul mio fusil e su sta spada ancora
Che niente giova e mai no gioverà
Le lagrime, i singiozzi, i cighi, i urli,
I pugni in sen e l' ongie in le baise
De chi vive per l' aneme dei morti;
E po' sapiè, carissima mia Dama,
Che la morte xe certa per chi vive,
Che la morte xe el fin de tuto quanto
E che 'l sepolcro xe l' ultima camera.
Via, metè in pase el cuor, e metè in ordene
El cervelo, gran Dama. In sta maniera
Gh' à parlà quel Soldà tanto pietoso;
 E tuto lu gh' à dito quel che pol
 Iluminar la mente rebaltada
 Dei mati Vivi per i Morti sordi.
 Ma sta gran Dama, che consolazion
 No voleva sentir d' alcuna sorte,
 Più indiavolada e inferocia che mai
 Contro se stessa s' à strazzà d' atorno
 L' andriè vedovil, e po' sta furia
 S' à despiantà el cignon e le bandete
 E sul muso al Mario tuto à butà.

De coragio no s' à perso el Soldado

Gnanca per questo , e l' è tornà a l' assato ;

E con discorsi teneri e patetici

El s' à tanto insinuà a poco a poco

In tel cuor , in tel anema a la Dama ,

Che al fin in pase la s' à messo . Alora

El Soldà l' à pregada e sconzurada ;

Per la gran Diana protettrice d' Efeso ,

Per la Dea de le caste , de le sante ,

De le sculazza-banchi e basa-pile ,

De magnar qualche cosa , e no morir

Da fame e da dolor in t' un Sepolcro

Zovene , bela , viva e spiritosa .

La Cameriera xe stada la prima

Che vinta da la grazia e dal bon sesto

E da l' arte oratoria del Soldà ,

Ma sora tuto da l' orenda fame ;

À bevù un po' de vin , e à magnà un pan :

Cussì rinvigorida e sustanziada

La panza , tuti do' i se gh' à messo .

In zenochio davanti a la Matrona

Che aboriva el magnar quanto la vita ;

E cussì quela Serva gh' à parlà :

Cosa ve servirà , cara Parona ,

Cara Zelenza , morir qua de stento ,

E viva sepelirve avanti el tempo ?

Tuti sti vostri pianti e ste gran smanie

No le serve , el vedè , no le val niente .

Al cadavero e à l'anema del mortò.
Crèdè, Zelenza, lassè andar s'è eror
De pianzer un Mario che spuzza a vento;
E godemo, Parona, el gran piacer
D'èsser zovene ancora e vive al mondo:
Sto corpo aponto qua desteso in tera,
Sto cadavero pien de vermi e marza,
Questo ne fa conosser che dovemo
Anzi tegnir più conto de la vita,
E de tuti i piaceri de l'età.
Finimola, Zelenza, via magnèmo;
Tiolè sto pan, sto toco de salà
Che ve dà sto Soldà pien de buon cuor;
Magnè sta carne, via, bevè sto vin,
E quando che se' in gambe; andemo fora;
Per carità ve prego e ve sconzuro,
Da s'è orido Sepolcro e spuzzolento
Perchè resister no se pol mai tropo
Co' se trata de vita, e pò' a la forza
De la gran verità sempre se cede.
Cussi la Dama, indebolia da fame,
E iluminada da tanti riflessi
De la Serva e Soldà gran oratori,
S'è risolto al fin d'averzere la boca
E lassarse da quei imboconar
Come una gaza o un fantolin da tete:
La ga fato in principio un po' de smorfie,
Propie d'ogni gran Dama e naturali,

L' à butà fora; l' à cigà; *No voggio,
Lassème, voi morir a boca suta.*

Oh povero Mario! oh gran Mario!

E po l' à magnà come una lova
Tuta quanta la cena a quel Soldà;
Miserabile cena! Ma ogni cosa,
Anca ordinaria e insulsa, xe gustosa
Co gh' è de quella maledeta e fiera
Fame rabiosa. El seguito dirò...

Oh Dio, cosa dirò! oh Dio, che cosa!

Dirò quello che ognun lo sa per prova;

Dirò che quando se xe sazj e pieni

Se sente un certo no so che, un certo

Sgrissamento in tel sangue e ne le vene.

Basta... me son spiegà tuto abastanza.

Onde el Soldà, che ghe ne sa de Done,

Se no Dame, ma pur la Dama è Dona;

Vista la bela che voltava al Cielo,

Come che fa le menole, i bei occhi

Per sostanza del cibo e de natura,

Subito senza darghe alcun respiro,

El gh' à chiapà una man, el l' à strucada;

Quela gran Dama, quella perla,

Quela Stela, quel Sol de l' onestà

Xe restà vinta dal Soldado esperto

Con tute le lusinghe e coi bei modi

Dei quali el s' à servio per obligarla

A viver, a magnar, a più no pianzer.

Sta casta **Dama**, sta **Matrona d' Efeso**
 Co la coa de l' ochieto languideto,
 La nova godendose in te l' anema
 Belezza e bona grazia de quel omo
 Ben fato in schena e largo in te le spale,
 Pien de vita e de brio e ardir che infama,
 La gera là là per andar zo
 Col Brenton, co la Brenta e le Brentèle:
 La Serva ancora (che le Serve agiuta
 Sempre la barca e sempre anca el batèlo)
 In favor del Soldà se manizava,
 E ghe diseva: *Via da sto omo*
Cognossemo la vita tute do;
Oh via, molèghe; e po', cara Zelenza;
Ve seu forsi scordada i gran solazzi,
I piaceri col quondam Senator?
Molèghe, a mi squaquero tuto,
E dirò fora che de sta gran Dama
Un Soldadelo a riportà vitoria.
 I novi amanti xe restai a le strete
 In onta al morto Senator Mario.
 In tuta quella note e nei do zorni
 Seguenti ancora i è stà serai la drento,
 E quanti xe po' vegnui per veder vivo
 Quel spechio d' onestà limpido e pufo,
 Tuti à credesto che la gran Matrona
 Morta la fusse per dolor e fame:
 Za el povero Soldado infatuà

E incantà da l' amor de la so' Bela
 Gera fora de lu. El so' gran spasso
 Cresseva sempre più stando là sconto ;
 Spasso grandò, ma grandò, perchè mai
 No gh' è nessun ch' el pensa e se figura
 Che un Soldado , guardian de un per de forche ,
 Goda le bone grazie de una Dama .
 Cossì in amor difficoltà e cautela ,
 E ogeto inaspetà nobile e chiaro
 Ingrandisse ogni gusto , e po' in amor
 La fantasia fa più de la realtà
 Scaldar la testa e 'l cuor e i sentimenti .

Sto felice Soldà , sto glorioso

Solamente de note , lu lassava
 La Dona sconta drento in quel Sepolcro ,
 E in Efeso l' andava presto presto
 A comprar da magnar boca che vustu ;
 Spendendo del so' Prencipe la paga
 In amor drio le Dame in sepoltura .
 Ma la fortuna fa cambiar aspeto
 Tuto zorno a le cose ; e l' omo alegro
 La matina , la sera el bate l' oca .
 Oh Dio , cossa xe nato ? un caso orendo !
 I parenti d' un morto xe vegnui
 E i à portà via el Picà , e i l' à sepolto .
 El Soldà s' à lassà cussì gabar
 Per tropo snanerarse in quella Dama
 A tute l' ore senza far la guardia !

Ma ñol sañeva ; che la Dama spesso
 Fa andar la testa atorzio a chi ghe tende ,
 E fa spesso scordar i so' doveri
 A la Toga , a la Spada , al Colarin ?
 Quando el Soldà visto à la Forca voda ,
So' morto , l' à cigà ; morto e fenio .
 Subito desperà l' è corso , e tuto
 El gran caso a la Dama el ghe conta ,
 Disendoghe : *No posso viver più ,*
Dama , mi son seguro de morir
Doman per man del Bogia in vista a vu
E quà sarò picà per quel Picà
Portà via dai parenti e sepelio ;
Onde , in sto ponto , con sta spada , è meglio
Che qua me passa el cuor , e che finissa
Senza infamia la vita , e che castiga
Adesso el falo mio senza del Bogia .
Su , cara Dama , su , cara Matrona ,
Per pietà deme un sito , deme un buso
Vicin al Senator vostro Mario ;
Sì , sì , gran Dama , sì , anema mia ,
Se avè pietà de mi e amor in peto ,
E se grata me se' per tanti spasemi
E per la morte che me dago adesso
Per amor vostro e mio , via presto presto
Preparème una fossa ; e disponève
A pianzer col Mario anca el Moroso
Che la vita v' à dà per tuti i versi .

La Dama ; piena de pietà e vergogna ,
 La s' à messo a cigar : *Ah povereta* ;
Ah quante volte mai goi da morir!
No, no, sorte crudel, no sofrirò
De do' cari la perdita in t' un dì,
E in t' un sepolcro tuti do' sti cari...
No, no, ... più tosto... Oh s' impichi
Quel morto che no sente afano e beia;
Che no go cuor de vederte a picar
Caro el mio vivo, caro el mio Soldà,
Soldà de sto Castelo e de sta Piazza.
Tio' su, caro, sto morto, porta via
Sto morto, e su la forca va e lo taca,
E salvate, ben mio, vissere mie,
Salvate in vita per la to' Matrona,
Per la to' Dama salvate. In sta forma
S' ingana la Giustizia, Efeso e 'l Mondo.

Apena la ga dito ste parole


Ch' el Soldado e la Serva à tiolto in spala
 El povero Mario, el Senator,
 L' ogeto dei gran pianti e de la fame ;
 E intrepida e insensibile la Dama,
 La Matrona, l' Onesta, la Fedel ;
 La gh' à slongà anca ela una manina,
 E in tre su quella Forca i l' à tacà.

Eco de l' aslita Matrona l' onestà!

P O E S I E

DI

MARC' ANTONIO ZORZI



NOTIZIE

INTORNO


A MARC' ANTONIO ZORZI

PATRIZIO VENETO

Molti sono gli Scrittori di merito distinto il cui nome cade in assoluta dimenticanza o per la ritrosia loro a rendere pubblici i frutti del lor ingegno, o per una qualche mancanza di circostanze favorevoli alla lor fama. In questo novero si può mettere Marc' Antonio Zorzi Patr. Ven. nato da Lorenzo Zorzi e da Regina Contarini nel dì 26 febbrajo 1703. Educato alle ottime discipline, come lo furono gl' illustri suoi contemporanei concittadini i Farsetti, gli Algarotti, i Foscarini, i Gozzi, i Goldoni e tant' altri, prese egli singolare affetto alla Giurisprudenza e

all' Oratoria , e salì in così alta fama nel suo Governo da essere in qualche crisi della Repubblica onorato di dilicatissimi ufficj . Si mantenne Giudice incontaminato ne' Consigli di Quaranta per oltre 44 anni , ed ivi per lunga epoca coprì eziandio l' ufficio di Contradditore , che vale a quello di Procuratore Regio . Le più intricate quistioni del Foro erangli argomento di private esercitazioni , e lasciò varj scritti ne' quali si veggono svolte e rischiarate quelle idee del giusto ch' erano per le Venete Costituzioni il Codice de' Magistrati . Agli studj ameni dedicava gl' istanti di suo riposo , e restano presso i suoi Eredi molte Operette di varia letteratura , ed alcune versioni dal Latino e dal Francese di componimenti teatrali . Appassionato poi il Zorzi per il patrio dialetto , trasportò in questo alquante Orazioni di Cicerone , che tuttavia restano inedite , e moltissime Poesie dettò , alcune delle quali peraltro con troppo

libera penna, siccome fatte per rallegrare le Società nelle quali egli era sempre desideratissimo. Le pochissime che noi pubblichiamo sono forse per gentilezza di pensiero e per felicità e candore di sposizione, tra le più gaje della nostra Raccolta. Visse il Zorzi assai lungamente, e rimase troncato il filo della sua esistenza nel dì 29 gennaio 1787. Era di statura piuttosto alta, di leggiadro aspetto, di occhi vivaci, assai dignitoso del portamento, e a malgrado degli oltraggi della vecchiaja conservò sempre quella vivacità di spirito e quell'attività giovanile che a pochi il Ciel largo dispensa.



EPIGRAMMI

I

Nemighe dei omeni;
Per genio crudeli;
Superbe, infedeli;
Le Done se chiama;
Nè tase nessun;
E pur co sti radeghi
Chi è quel che no ama?
Che no s'inamora?
Che drìo no ghe cora?
Disèmene un.

II

Se fusse una Dona
(Che 'l Ciel me perdona)
El primo zeloso
Saria butà zoso
Da qualche balcon:
Da sti maledeti
Se strupia i diletì,
Se guasta a l'estremo
La meglio che abiamo
De tante passion.

III

El cuor me dise
 Che go un rival,
 Ma no ghe credo.
 Nè ben nè mal
 No xe prudenza
 Crederghe a lu.
 Lu, per esempio,
 Me dise spesso,
 Che doveressi
 Amarme adesso;
 E pur per questo
 M' ameu mo vu?

IV

Soportè che parla schieto:
 Qualche volta, bel museto;
 Tante smanie no averessi
 Se i rossori ve vedessi
 Che ve fazzo comparir;
 A l'ussir de la mia ose
 Vu parè de gigli e rose;
 Quei ochieti se v' infama
 Sia da sdegno o sia de brama;
 E mi so quel che i sa dir:

V

Se fa presto a dirve bela
 Perchè abiè a tegnirve in bon,
 Ma mi stimo
 Quel che primo
 Poderà dirve anca bona,
 E a le prove ariverà .
 Per no esser mai minchion
 Faria mi sta cognizion .
 Per le vostre glorie intiere
 Torna conto aver per vere
 La belezza e la bontà ,

VI

Certe finezze
 Che tuti veda
 No val un soldo
 D'una in confronto
 Che nessun veda;
 E quel ch'è sconto
 Xe vero amor .
 Una brisiola
 Piutosto togo
 Che una cusina
 De fumo e fogo ,

Che no me saziò
De solo odor .

VII

Mi son giusto de puina
Che ogni poco me rovina .
Ochi , cavei , colori ,
Tuto me par tesori ,
E unite a mile a mile
Sento le tentazion .
Me incanta le bianche ,
Me acende le more ,
Son sempre l' istesso
A tute le ore ;
Pulite e pitoche
Per mi tuto è bon :

VIII

Xe ben che i omeni
No sapia tuto ;
Più dolce è 'l fruto
D' un ignorante
Credulo amor .
Chi tropo cerca
Tropo anca trova ;

Chi ò no vol prova
 Ga el privilegio
 D' un dolce eror.

IX

Bele parole !
 Co le xe sole ;
 Nina , tegnivele :
 Manco che chiacolo
 Più gusto go.
 Urtème , dème ,
 Paremo mati ;
 Ma che i sia fati ;
 Per altro a chiacole
 No me fe zo :

X

Co semo gonzi
 No ve piaseмо ,
 Co no ghe semo
 Vu v' instizzè .
 Disème un poco ?
 Qual xe la regola
 De star con vu ?
 Sariela fursi
 D' esser aloco

Co' volè pocó? .
 E d'esser omo
 In quel momento
 Che volè più?

XI

Col vien, tolèlo
 Come se 'l Cielo .
 Ve lo mandasse;
 Che da là un poco
 Nol ghe xe più .
 In un momento
 Se cambia el vento .
 Favor de Dona
 Xe come l'onda .
 Che ora va zoso
 Ora va su .

XII

Le vol aver un muso
 Che se ghe mora suso ,
 Le vol che tuto sia
 Belezza e legiadria .
 E po ... le man a casa ,
 E po ... tegnirse in fren .
 Chi pol senza esser mati

Acetar mai sti pati ?
 Disèghelo a dei legni
 Che i toga de sti impegni ;
 Opur no andè cercando
 Che se ve voglia ben .

XIII

El diavolo no è bruto
 Mai tanto quanto el par .
 A no se desperar
 Un zorno nasse el caso
 Che no s'avea sperà .
 Le Done se compiase
 Del credito de fiere ,
 Ma le vol anca el gusto
 De no durarghe sempre
 Co le se l' à formà ;

XIV

Sentirse pieni
 De afeti e moti
 Tuti tereni ,
 E dover fingere
 Che 'l proprio mal
 Sia solo impulso
 Spiritual ,

Quest'è 'l tormento
De amar persone
De qualità.

Chi è mai si strani
Nel so' interesse?
Tra i gati e i cani
Ognun se sagnaola,
Se sbaglia ognun,
Nè 'l so bisogno
Sconde nissun,
Tuti el socore
Co una grandissima
Sincerità.

XV

No è sempre vero
Quel che ve par;
L' ochio xe un giudice
Che in più d'un caso
Xe stà inganà.

Come che burla
Certe belezze
Co' andè vicin;
Ve burla ancora
Certe saviezze
Che avè stimà.

XVI

Quela saviezza

Che vantè tanto
No ghe xe un'anema
Che me la nomina
De quei che parla
Con mi de vu.

I me domanda

Ben , se se' bela ,
Ben , se se' zovene ,
E co ghel digo
I xe contenti
Nè i vol de più.

CANZONETTA

Tuti va in colera
Che se' crudeli ,
El mondo mormora
Che se' infedeli ,
Ognun ve biasima ;
Ve acusa ognun
Chi de volubili ,
Chi de superbe ;
Chi ye mortifica
Da dure e acerbe ,

E senza radeghi
No gh'è nissun .

Se se' difficili
Ne fe' despeto ,
Se tropo facili
Perdè el conceto ,
No gh'è giustizia ,
No gh'è perdon .

Chi sente i omeni :
La Dona è dano ,
I saria anzoli
Senza sto afano ,
Vu d' ogni vizio
Se' l' ocasion .

Donete amabili ,
Lassè che i diga ,
Vedo che l' diavolo
Però i castiga ,
E ch' i ve spasema
D' intorno ognun .

Sto gran descredito
Però no i sana ,
Tute ste smanie
No li lontana ,
Con tuto st' odio
No stè a dezun .

Ah chi ve carica
De tante acuse

Da sè medesimi
Vol far le scuse
E 'l proprio biasimo
Giustificar.

Se vu se' cocole,
Se se' amorose,
Se se' inganevoli,
Se se' ambiziose,
Cossa ga i omeni
Da no acusar?

Voria anzi vederli
Co sti fracassi,
Se vu altre femene
Vu li tentassi
Con quele smorfie
Che femo a vu .

Credeu che 'l vincerli
Saria un gran fato?
Che assae difficile
Saria el contrato,
E insuperabile
La so' virtù?

Vardè co' pessimi
Ch' i è da so' posta,
Nissun li stuzzega,
Nissun se acosta,
I è lori el diavolo
Che va a tentar.


Vu se', dolcissime ;
Vu le tentae,
E po a sti Satiri
Ghe par assae
Se vu se' docili,
Se andè a mancar?

Ma per mi dubito
Che 'l mondo andasse ;
(Se la modestia
Vostra mancasse)
In precipizio
Senza più fren ;
E che abiè el merito
Che nu no andèmo
Come le bestie
A un vizio estremo,
Che un certo spirito
Vostro tratien .


L' IPOCRISIA

SATIRA

DEL P. CACCIA



Molte Satire del P. Cacia ci sono venute alle mani, come non meno altre di Gio. Francesco Businello, del Prete Giambattista Grotto, di un Mocenigo, di un Badoer, e di altri Scrittori della metà del XVII e del principio del XVIII. Secolo. Quantunque non manchino di buone immagini, di sali, e di acute riflessioni, nulladimeno non istanno a martello co' Componimenti de' più colti e più moderni nostri Scrittori. Abbiamo inserito questa sola Satira *dell' Ipocrisia*, scritta da un uomo di cui non conosciamo altro che il nome. Ci è sembrato che potrà essere letta volentieri, ed è poi quasi la sola che imbrattata non sia di molle sozzure.



S A T I R A

Le donne , i cavalier , l' armi , e gli amori
Canti l' Ariostò , e la so' Armida el Tasso ;
Venero tuti , e reverente lasso
A i poeti de l' Arno i primi onori .

Cedo l' eburnea cetra e l' arco d' oro
A chi à savesto immortalar Adoni , (1)
Me basta un canachion pien de taconi
E un ramo de sambugo per aloro .

Stufo de seguitar vena amorosa
No trato più d' Amor che passa el guanto ,
Che m' à fato ingiotir più legno santo
Che no se basa in Coro a la Certosa .

Go un relógio da neve in t' una spala ,
Un altro da siroco in la zontura ,
Osservazion cavae da la natura ;
Pronostici crudeli che mai fala !

Done , mai più ve lodo , e no me ehiapo
Se questa xe la chiusa dei Soneti !
Renonzio l' arme ai vostri moroseti ,
Seguito Giovenal , e son da capo .

Musa , me svegia un celebre motivo
Che meteràve spirito a un aloco ,

(1) Il Cav. Marini .

Che pizzega el tavan stupido e gnoco
 Nato senza comare in tel cortivo .
 Per assalir un morbo velenoso
 Rabia , forza e valor vago cercando ,
 So che l' impresa e che l' assunto è grandò ,
 Co' è quel del Tonsi Agostinian famoso . (1)
 Quest' è l' Ipocrisia , morbo e contagio
 Che dei quaranta di chiama la piova ,
 Peste cussi nefanda che no giova
 L' aseò , la ruta , l' osmarin , nè l' agio :
 Questa xe quela birba impertinente
 Che senza respetar Bole o Censure
 Con sacrilego pie rompe Clausure ;
 Frequenta i Chiostri e fa danar la zente ;
 Gramegna maledeta , amara e salsa ,
 Tossego a la virtù , solfere al Cielo ,
 Sceleratezza in maschera de zelo
 Che bate in fazza a Dio moneda falsa .
 A criolar , Signor , con diligenza
 El formento che dà l' Ipocrisia ,
 M' insegna la moral filosofia
 Che pagia resta el fito e la semenza .
 Oh quanti Farisei che soto el scorzo
 D' un' indegna pietà move a deliri !
 No so dove ch' i trova quei sospiri
 Che basta mezo a destuar un torzo .

(1) Era il P. Tonsi un Predicatore di molto grido .

- In** Chiesa i bate el peto a colpi fieri ,
 Che quatro un bacalà buta in boconi ;
 Qualcun par un fachin , ma de quei boni
 Che liga e pesta pevere ai spezieri .
- Se** caminando i vede Cristi o Crose
 D' un infinito Amor sacrato inesto ,
 I canta in primo ton, *propitius esto* ;
 Ma dei falseti el Ciel no scolta l' ose.
- Un** tal veste a l' usanza del Cigogna
 Co le scarpe de bruna e un capelazzo
 Che pol servir d' ombrela in Canalazzo
 A quei che pesca cievoli da toгна .
- El** ferariol xe fato a la Spagnola
 Con un zipon de sagie più desmesse ,
 El porta po le cingie a le braghese ,
 E qualche par xe fate a cichignola .
- Un** tronco par el colo da far calmi ,
 Storto come le suste dei lucheti ,
 Fiamengo xe el colar, e i manegheti
 I par quei d' un Rabin che spiega i Salmi :
- Questo** xe quel che loda l' astinenza ,
 Predica familiar dei bachetoni ,
 Ma el gode un seminario de caponi
 Che studia de ingrassar la penitenza .
- El** dise tuto el mal del Bonacina (1)
 Che de la colazion defende l' uso ,

(1) Celebre Scrittore moralista.

E se 'l podesse el macherave el muse
Al Diana che ne sera la cusina. (1)

Un pasto quando el zuna el fa in Castelo,
Ma un pasto che vol dir quatro disnari,
E che pol impenir diese boari
Stufi de solfisar: *va là, morèlo*.

No trovo in tuta l' arte dei Tentori.
Mistri che tenza ben come i Chietini,
Parlo de quei birbanti soprafini
Che roba a la virtù nome e colori.

Talun, coto al reverbero de un viso,
Vien via col *delectasti me in factura*,
E unindo al Creatore la creatura
Fa regola del tre col Paradiso.

Certi, in Cale remote (e questa è bruta!)
Medita più finestre che misteri,
E mentre i finze d' osservar piteri,
I varda le cassele a qualche puta.

Molti, che par i Maghi de Pilato,
D' amor no i sa capir qual sia la rede,
Ma in cale del Carbon spesso i se vede
A far l' aniversario al celibato.

Altri dise, ch' al senso i par de piera,
E con Giuseppe Casto i s' incorona,
Ma se i lassa el tabaro a la Parona,
I tira per el busto la Massera.

(1) Il P. Diana altro moralista accreditato.

No se pol dir i sentimenti sodi
 E l' aversion che i mostra per gabarne!
 Ma se ghe vien qualche bocon de carne,
 I la sa cusinar in cento modi.

I ruza come l'onda apresso al Molo
 Se qualchedun a Strà spesso li manda,
 Ma ga rason la birba veneranda,
 Perchè l'Ipocrisia no lassa el Dolo!

Talun va in certe Case cussì fate
 A predicar miracoli de testa;
 E se la nena i cata poco lesta
 I ghe sporze segreti da far late.

I pla le Camariere co i Sermoni
 Circa le obligazion del proprio stato;
 E qualche aloca impara dal beato
 Tegnir a man la roba dei Paroni.

Chi porta un Agnus-Deo, chi una Croseta;
 Chi un Santo al fantolin, chi a siora Mare;
 Favori che va in testa de sior Pare,
 E scandaliza i puti anca in seleta.

Chi segna la solana su i casini;
 Chi agiuta a indopionar le cosse sante;
 Acìò vicin al sen l'ochio furfante
 Goda la caponera e i colombini.

E questi è quei che vanta esser de giazzo?
 Oh chi podesse aver le crepe fate
 In ocasion de romperse pignate,
 Che bel monte faria de bon terazzo!

Se i vede qualche Venere barona;
 D' un lascivo penel pazzia che toca;
 Mi credo che ghe vegna l' aqua in boca
 Bastante a rinfrescar Piazza Naona.

I loda col disegno la figura,
 La proporzion, la mina, el viso, el peto;
 E un' estasi che vien da impuro afeto,
 Onora più de l' arte la Natura.

Dopo la sbabazzada a panza piena,
 De l' Ipocrita fin massima infame,
 I dise, che l' autor merita fiamme,
 E che ricerca l' opera ugal pena;
 Malan che Dio ghe dia! quest' è un schiamazzo,
 Da farse a prima vista dei colori,
 E no sfogar el zelo da Censori
 Forsi dopo d' aver la copia a sguazzo.

Chi vol sentir a mormorar con frase
 Ascolti de l' Ipocrita i Sermoni,
 Consideri el parlar dei Bachetoni,
 Cigale de Pluton che mai no tase.

I à certe bizzarie che toca l' osso,
 E presto i fa d' un Santo un Anticristo;
 Nè forfe, nè sartori el mondo à visto
 Che sapia tagiar meglio i pani adosso.

I dise: *Quela è un viso da sforzada,*
Quel altro vive a spale de l' amiga,
Quel tal xe pien de bezzi e nol sfadiga;
Qualche ziogo de man serve d' entrada;

A Momola ghe piase le marende;
Lugrezia fa una vita cortesana
E so Mario la crede una Susana,
Ma 'l ga rason perchè do' vechi spende;
Quel povero novizzo è un soranelo
Ma presto el sarà bon da tacar soto,
La femena è d' un genio tropo roto,
Xe un Petener compare da l' anelo;
Peraltro una bel indole ghe vedo,
La confessa el Piovan; ma ste cavale
Acusa i scapuzzoni de la Cale
Ma quei del Sotoportego, no credo.
Ghe pratica per casa do' Francesi
Col brio de la Nazion tuta dolcezza,
Capaci de infiapir ogni belezza
Con qualche idropisia de nove mesi.
Polonia se diletta de piteri,
Ma quel che dona i fiori vorà el fruto,
E se de le so man la fa de tuto
Ve lo pol dir chi gode i lavorieri.
Ogni zorno, che piova o che tempesta,
La visita un bon sior persona dota
Che paga ben i merli de la cota,
E meglio la pedana de la vesta;
Per devertir el scandalo sumario
Se dise, che l' è Munega acetada;
E che fratanto un Prete de contrada
Ghe spiega su le rubriche el Breviario.

Diga però la birba veneranda,
Che ste Congregazion in certi siti
No le pol esser mai dei Sacri Riti,
Che tuto sol finir in Propaganda.

Marieta è piena d'oro e de zechini,
Perle, zogie, mantò, busti e carpete,
Che se la vol un zorno far gazete
No basta una tribù de Giacudini;

Senza gratificar qualche divoto
El diavolo no comoda i so' altari,
E certi paramenti singolari.
Vol dir: la grazia è fata, e sciolto el voto.

Betina xe più soda e più racolta
Dopo quella disgrazia sì famosa
De perder a una festa morbinosa
L' onor e la manizza in t' una volta.

So nezza, innamorada coi latini,
Se fa insegnar da un Frate concordanze,
Ma zureria che avanti le vacanze
La sà i futuri misti coi supini.

La fia del Masteler vedo in sconquasso
Confusa dal maron e da le dogie,
Cussì dopo che molti à messo a mogie
O crepa el cerchio, o va el mastelo in fasso.

So' pare, che xe un omo de quei tondi,
Pensa de remediar co la pavèra,
Ma la sfesa ripiego più no spera
Se le doghe davanti à roto i fondi.

Musa ; basta cüssi per dar un sagio
 De sti basa-pilèle che à l' inzegno
 Esposto sempre al colpo, al tiro, al segno ;
 Come che xe i morteri da bersaglio.

Se vede sgangolir più d' un pupilo
 A far sopra redoto col so' pianto,
 E chi à magnà l' entrada se fa un Santo
 Che pianze tuto el di da cocodrilo.

No tira più la Vedova el livelo,
 Xe perso col Nodaro l' Istromento,
 E sior Compare tira sie per cento
 Pagando un bezzo d' ogio al Capitelo.

Per racontar le furberie segrete
 Ghe vol altro che un pan de sete mesi !
 Quest' è la carità dei Calabresi
 Robar i manzi e dar i corni al Prete :

Ghe vol altro che un Vesparo da Morto
 A spegazzar l' usura d' un contrato !
 Pol esser ; ma nol crede gnanca un mato
 Ch' abia coscienza drete un colo storto.

L' ingano sti furfanti chiama zelo,
 Sussiego el fasto, e passatempo l' ira,
 La rognà, sensual sangue che zira,
 E la furfanteria, voler del Cielo.

De l' Ipocrita infame, iniquo e tristo
 Questa xe l' empietà, questi xe i modi,
 Quest' è la so' moral: basar i chiodi
 E renovar le piaghe a Gesù Cristo.

Mio Dio , mio Redentor , Monarca eterno ,
 Sta razza fa conossere l' impegno
 D' andar a ca del diavolo co inzegno ;
 Piombar con bon esempio ne l' Inferno!
Signor , a seguitar la vostra frase ,
 Deholo no gh' è piegore che basta
 Da travestir i lovi che le guasta
 E mete in confusion pastori e case .
Va machiando l' onor dei vostri Altari
 Sta fezza abominevole d' abisso
 Che a tanti ve fa pianzer crocefisso
 Con lagreme ateiste e da corsari .
Le più sagre funzion questa profana ;
 Ogni liogo è teatro dei strapazzi ,
 E Case e Chiostri e Betole e Palazzi
 Sia la Corte Ecclesiastica o Profana .
Quel Chietin mai no leva la portiera
 Senza qualche Orazion giaculatoria ,
 Ma tuto quanto el filo de l' istoria
 Lo inaspà una pension ch' el santo spera .
In la Scuola infernal dei gabamondi
 Osservo de le femene a montagne ,
 Che Fuste desarmae da le magagne
 Xe piene d' erba e cape soto i fondi .
Una finze vision degne de riso ,
 Un' altra vede un Anzolo in altana
 Che strapianta lusverde e mazorana ,
E molte fa babao col Paradiso .

Taluna, dal Mario cargà de bote ;

Santifica el brusor e l' accidente

Col dir, a chi ricerca la innocente,

Che la bastona i diavoli la note.

Certe visita Cristi e le Madone

E finze de zunar el marti e 'l zioba ;

Chi fa tre passi a l' ora e se fa goba ;

Chi tira zo un Altar, chi le colone.

Altre ga un rosarion ch' ogni stracolo

Fa scantinar un fasso de medagie ;

A l' ochio le par quei da l' antigagie,

Al son mi le diria Birbe da nolo.

Molte portae da pizza religiosa

Va basando pianete ai Sacerdoti ;

E dona soldi ai zoghi più devoti ;

Sforzo baron de carità pelosa.

Diverse tien Breviario longo e breve

E ghe ne dise in tuto una fazzada,

Al Ciel le dà, a ogni riga, qualche ochiada

Come fa l' oche o l'anare che beve.

Fra tante solenissime Priore

Se trova qualche puta de capricio

Che mostra devozion, e l' è artificio

Per andar in gatezzo a tute l' ore.

Xe modesto el vestir, devoto el passo,

Gravissimo el parlar, pien de dotrine ;

Le par tante novizze Capucine,

Ma tuto a fin de far d' ogn' erba fasso:

D' amor la credenziera tien coverta
 Un velo atorno al busto sui cordoni,
 Ma tante sera in portego i balconi
 E brama che la porta resta averta.

Taluna finze l' estasi de Chiara ,
 I gusti de Teresa , el cuor , le brame,
 Sacrilega invenzion d' anema infame
 Che studia colpe e danazion impara.

Le sospira , ma un viso xe el motivo ;
 Lè pianze , ma l' è un torto del Moroso ;
 Le prega , ma 'l fervor domanda un Sposo ;
 E tuta l' Orazion xe in genitivo .

In conclusion l' Ipocrisia , confesso ,
 Xe un' empia enormità de chi no crede ,
 Sonifero infernal contra la Fede ,
 Velen per ogni età , persona e sesso .

Orsù , benchè sia vasto l' argomento ,
 Musa , remeti pur le pive in sacco ,
 La Predica xe al fin , l' inzegno è straco ,
 No andar in Sagrestia , nè per Convento .

Vostra sia pur , Signor , l' anema pura
 Che v' ama , adora e serve con schietezza ;
 E a chi ve sporze un cuor tuto dopiezza
 Ghe vegna anca el malano in sepoltura .

Benedeto sia pur l' omo onorato
 Che dopo la sbrissada maliziosa
 Vien a conti con Dio , paga la nosa ,
 E fa saltar l' Esercito beato .

IL CIARLATANO

NOVELLA

D I

P I R R O T E O Z Z I

E


I D E B I T I

CAPRICCIO

DELLO STESSO AUTORE.



Si è serbato il nome anagrammatico di *Pirro Teozzi*, così piaciuto essendo al gentile Autore di questi due Componimenti, il quale con vena felice molti altri ne ha scritti che meriterebbero di vedere la pubblica luce.



NOVELLA

In Nankin, gran Cità ;
Un dì xe sta tacà sto Manifesto,
Scrito in arcicruschevole Toscan
Ma che mi lo tradugo in Venezian :
Presso a poco el contegniva questo :

*El famoso Tita Furta ,
Arlevà da Gambacurta ,
El xe sta de qua e de là
Dei so simili per ben ,
E in Nankin adesso el vien
A portar la sanità,
Nè se trova malatìa
Che nol sapia mandar via :
El fa impiastri, el fa ceroti
Per guarir da tuti i mali, }
L' ogio el ga per i ossi roti,
El ceroto per i cali,
El guarisse le buganze
Col siropo de naranze ,
Per le sterili el sa far
Certe pilole famose*

*Che le fa presto ingrossar
 Tanto vechie quanto tose,
 E a quel' altre che paura
 Le se sente a partorir
 Co un ordegno el le assicura
 De saverle isterilir.
 A quei mali che fa spizza
 In tre zorni el ghe la schizza
 Con el late de capon
 Che a guarir sti mali è bon.
 Co' un specifico famoso
 Da la gota lu guarisse,
 L' ulceroso, el cancrenoso
 Soto lu in do di sparisse;
 Co l' elastico el fa cinti,
 Cava denti a l' uso inglese,
 E 'l li mete, a chi vol, finti
 Ma bei, forti, a la francese.
 I orbi vegna, i sordi, i muti,
 Quei che sofre el bruto mal,
 Vegna tuto un ospeal
 Lu guarir s' impegna tuti.
 Ma per altro sti segreti,
 Benchè i sia certi e perfeti,
 El li calcola pocheto
 Se 'l li vol paragonar
 A un mirabile segreto
 Che farà trasecolar.*

Questo è un' aqua sorprendente ,
 Aqua-vite veramente ,
 Chi con quella un morto spruzza
 Va via subito la spuzza ,
 Po' del moto se ghe sussita ;
 Curte ; el morto ghe ressussita .
 De mil' omeni e anca più
 I Atestati el ga con lù
 De so' man tuti segnai
 Dopo ch' i è ressussitai ,
 E per prova evidentissima
 Che la cosa sia verissima
 Dentro un mese el verzirà
 Sepulture, e Monumenti
 E in Nankin se vederà
 Uno, no , cento portenti .
 E i Signori del paese ,
 S' anca xe dei ani assai
 Ch' i sia morti, dentro el mese
 I sarà ressussitai .
 El sta in fazza la Crosera
 A l'albergo la Massera .

Sto aviso a andar atorno à scomenzà ,
 E i siori Nankinesi ,
 Come tant' altri in tanti altri paesi
 Che crede le fandonie verità ,

Xe corsi a casa de sto Professor
 Per saver se 'l sia un aseno o un dottor.
 E i gh'à dito: Signor, la diga, è vero
 Ch' ela la cava i morti d' ani tanti
 Fora del Cimitero
 Forti e robusti come i gera avanti?
 Lu ga risposto: Le leza qua e le veda
 E a mi no le me creda,
 Le creda a sti Atestati
 Di quelli che mi ò ressussitai
 E che de proprio pugno me li ha fati
 Essendome obligai.

Le osserva pur, cussi le vederà

Se busie mi ghe diga o verità.

Eco, le leza qua:

Io Marchese - di Roca Fiorita:

La mia vita - la debbo all' uom dotto

Che di sotto - alla tomba l' uom toglie:

Senza doglie - esser sano m' avvidi,

Era morto - e risorto - mi vidi.

Eco un altro... *Io Duchessa dal Prato:*

Dallo stato - letale di morte,

Dove sorte - crudele cacciommi,

Liberommi - il grand' uom che gli spenti

Fa viventi - e mi vidi risorta

Dopo morta - da diecidott' anni

Pei malanni - che un tal mi donò,

Ma giuliva - io son viva - ed ei no.

Eco un terzo del Prencipe de Alton . . .

Eh no serve , i responde , no paron ,

S' à visto quanto basta

E a la so' abilità nissun contrasta :

I va via incocalii ,

Sorpresi , sbalordii ,

E i principali , apena che fa scuro ,

Per esser al sicuro

Se racolge in segreto quanti i xe

In un ritiratissimo Cafè .

Che fracasso de zente !

D' ogni età , d' ogni sesso ,

In trenta i vol parlar , nessun se sente

In quel tumultuosissimo consesso .

Uno cria in t' un cantòn :

Cospeto de Pluton ,

Stago ben se ressussita mio barba !

Recipe mesatina ;

E baso de la man sera e matina .

Sta visita , per sbrio , no la me garba .

Un altro sbragia: Mi son consolà !

Povero gramo , mi ch' ò redità

Dal Missier che xe morto a l' improvviso ;

Che mai me dava un traro

Quel tegna , quel' avaro .

Eh ch' el resta a l' Inferno ... o in Paradiso ...

Un terzo estatico

Al Ciel voltandose

Dise : Carissima
 Mugier vechissima ,
 Ti favi stomego ,
 Pur i to' talari
 I m' à incantà ;
 Quei m' à dà stimolo ,
 Quei m' à inzucà ,
 Quei rason unica
 Che t' ò sposà .
 No , no ressussita ,
 Resta pur là ,
 Lassime vedoo
 Per carità .

Va un altro da so' posta brontolando :
 Corpo de Baco , ancuo son Ofizial ,
 Se i morti va costù ressussitando
 Torno Sargente e forse Caporal ;
 E che la staga là , perchè sicuro
 Se va avanti sto afar torno Tamburo .

Trenta se fa sentir ,
 Quasi nissun capir .
 Diese se sente a dir : E mi , e mi ,
 Che l' è cussì , e cussì .
 Altri vinti a sbragiar senti : Scoltè
 De mi come la xe .
 Co' una vose da toro al fin un cria :
 Via tasè , pofardia !
 E un drìo l' altro parlemo

Se volè che qualcosa decidemo :
 Sta sbragiada improvisa de sto tal
 Xe següia da un silenzio universal :
 Allora el dise lu tranquilamente :
 Qua semo in tanta zente
 Chiamai da la paura
 Che qualche morto tornà in carne e in pele ;
 Sortindo vivo da la sepoltura
 El ne vegna a secar le tavernele ;
 Ma pur in tanti e tanti
 Chi d' un tal morto, e chi d' un altro teme
 Perchè avemo motivi in fondo oposti .
 Se andar volemo avanti ,
 (Posto che semo tuti quanti insieme)
 Separemos quieti in tanti posti ,
 E cercando chi à simile rason
 Coi compagni se unissa in t' un canton ;
 E co sta division fata gavè ,
 E che ogni causa la sarà raccolta
 Da ogni circolo , alor quanti volè
 Deputè per parlar uno a la volta .
 A tuti quanti à piasso sta opinion ;
 E i l' à adotada per acclamazion ;
 E per mostrar che ben l' avea disposto
 I va un drio l' altro a sceglierse el so' posto .
 In t' un circolo i richi va e i signori
 Che trema che ghe torna i compatroni ;
 Va in t' un altro le cariche e i priori .

Che perder no vorave i sedioloni :
 Qua poeti moderni e professori
 Che ga paura de parer minchioni ;
 De là ghe xe fin qualche camarier
 Che ga el spaghetti de tornar stafier .

Là un circolo ghe xe de vedovele
 Che à fufa che ressussiti el mario ;
 Quà un bozzolo se fa de tose bele
 Che se torna so' mare le à finio ;
 Là fradei che no brama le sorele ,
 Qua tutori che à fato el ben de Dio ;
 Gh' è fin dei Trufaldini e dei Tartaglia
 Che a menzionar Sachi e Fiorili , i ragia .

El preopinante è fato Presidente
 De tuta quella zente ,
 E un camarier novelo ,
 Stafier do' mesi avanti , e là bidelo
 Interinal , el cria :
 Se qua tra tanti e tanti
 Omo o dona ghe sia
 Che possa conseggiar se faccia avanti .

Certo Prior , no so se negro o bianco ;
 S'alza su dal so' banco ,
 L' ochio su tuti maestoso el zira ;
 Po' a l' uditorio fa una riverenza ,
 E movendose a susta ,
 La bereta e la tonega el se giusta ,
 Un fazzoletto neto fora el tira

El se suga, el se raschia, e po el scomenza:

Quod Deus conjunxit non separet homo.

*Onnipossente tu, tu quel c'hai fisso
A esistenza un confin, che torni l'uomo
Donde sortì, alla polve, il tuo prefisso
Sovvertirà un mortal? Chi giace estinto
Sposo è di morte, ed il connubio atroce
L'orrido laccio, cui l'ha morte avvinto,
Spezzato esser non può che da tua voce.
Quale orror se ciò nasce! Io capo scelto
Di mia sacra famiglia, onor, decoro,
Possanza, da un Prior già morto, svelto
Vedrommi? tornerò frate da Coro?
Si corra al Tempio, e nel fatal periglio
Voti e preci sciogliamo. Ecco il consiglio.*

Co l' à finido certa Vedovela

Ancora fresca e bela,
Che per el morto sposo
No la voràve perder el moroso,
La dise: Reverenda, la perdona,
Xe vero, l'Orazion xe santa e bona,
Ma quando ch' el pericolo sovrasta
Forza o destrezza in opera se meta,
Che l'Orazion, caro el mio ben, no basta.
Co' 'l pericolo gh' è, quel che l'aspeta
Armà de torzi, salmi, e procession
Deventa osèlo anca s' el xe un lion.
Eco el mio sentimento

Le Done in sto momento
 Xe quele che à da far la gran difesa ;
 Ma no miga co spade o co pistole ,
 Ma siben co le nostre arme da ofesa ;
 Vezzi , lusinghe , ochiae , grazie , parole .
 Qualche bela doneta de bon sesto
 Fazza del Professor la conossenza ,
 E coi nostri segreti presto presto
 Lo inamori in barba a la Sapienza ,
 E quando come un musso l'è inzucà
 De lu quel che vorèmo se farà .

A aprovà sta opinion un' Orfanela ,
 Fiola de do' gramazzi poveromini ,
 Che per esser graziosa fresca e bela
 E proteta da certi galantomini
 Sempre più el so' stato se migliora
 Col mestier onorato de la siora .

Mi go interesse , dise sta ragazza ,
 Che sto Dotor el vaga via scornà ,
 Che assuefata a magnar pan e spuazza
 Co' xe morta mia Mare ò respirà ;
 Ancuo mi me diverto zorno e note
 Allora Avemarie , polenta e bote .
 Amici cari , mi el mestier conosso ,
 Fidève pur in mi che me esibisso ,
 Che i pani i sò tagiar sora' ogni dosso
 E in tre dì sto Dotor lo inassenisso ;
 Giusto sti doti , al solo odor de un cotolo

La testa i perde, e i zira come un trotolo.
Mi ò studià per principj l' arte mia
E sò le suste che tocar bisogna,
Coi boni doperar l' ipocrisia,
L' umiliazion coi richi, la vergogna
Coi ragazzi mostrar e la passion,
E coi sapienti far le adulazion;
Ma mi farò *Che farai tu, cerasta*
Di società? vil donna
Ludibrio della gonna,
Dise un Poeta, al qual sempre contrasta
La cena col disnar, perchè el viveva
Tirandola a la meglio ch' el poteva
Con Dediche e Soneti,
Con qualche traduzion
Che fava compassion,
E scrivendo a impressarj dei Libreti.
E che, el dise fra lu coi cavei dreti,
Se torna redivivo
O Ariosto, o Tasso, o Metastasio, o Zeno
Non solo io più non scrivo
Ma non desino, oh Dio! ma oh Ciel! non ceno.
Che farai tu, rifiuto della rocca,
Vivi a' malvaggi, che a te no, a me tocca;
A me figlio di Apollo
Quell' anima piegar: pianger vedrollo
E il trarrà a forza a' desiderj miei
La magica armonia della mia cetra

*S' avesse il cor di pietra ,
 Se contra congiurassero gli Dei .
 E qual la polve ardente
 Dall' eneo tubo lunge il piombo scaglia ,
 Così l' uomo di vaglia
 Fuggir ratta farò da questo lito
 Il sovrumano risorgitor valente .
 Commosso, stupefatto, sbalordito
 Alla grand' opra io volo ,
 Se il merito fia mio sol, fia di me solo
 Il vostro premio . Amici miei , coi carmi
 Di tal vate, tal uomo si disarmi .*

Lu core via a compor la so' Cantata
 E nol sente cussi una gran risata
 Al grottesco pensier de mandar via
 El Professor a colpi de poesia .

Alora salta suso

Un certo sior Ilario ;
 (Gesù-Maria che muso !)
 El gera stà Sicario ,
 E po' fato Ispetor
 E diventà un Signor .

El dise : Corpo e via ,
 Sta buscara me seca ;
 L' impiego perderia
 Restando a boca seca ;
 Che sto ressussitar ,
 Perdi.... me fa tremar ,

Che l' Ispettor ch' è morto
 Ocuperia el mio posto .
 Se ancuo son quieto in porto
 Mi perdo el lessò e 'l rosto .
 Perdi torno Sassin
 Se nasse sto tantin .
 Sarave persuaso
 Cavarselo dal cesto ;
 Mi solo fazzo e taso
 E me destrigo presto ,
 Se fossi in opinion ,
 Co un colpo de piston .

Risponde : Che sproposito!

(Un omo de proposito
 Bravissimo Tutor
 D' un certo puteleto ,
 E che ghe bruseria più d' un pocheto
 Se tornasse a sto mondo el testator)
 Ilario mio , se solo vu el mazzè
 Qua semo in tropi , e solo nol savè ;
 E la sarave sporca ,
 Perchè restasse i morti in sepoltura
 Che dovessimo andar nu su la forca .
 Fradei cari , senti ,
 Mi penseria cussi ,
 Che la me par sicura :
 Mi farave un magnifico regalo
 Al Professor , a condizion ch' el vada

Per quel' istessa strada
 Che l'è venudo ; e l' anderà , no falo .
Sta idea ga piasso ; e infati lu à sunà
 Una sumeta non indifferente
 Fra quei che gera là ,
 E fra quel' altra zente
 Che de veder gaveva tropa angossa
 A saltar su i so' morti da la fossa ;
 E po' el ghe l' à portada al sior Dotor ,
 Disendo con altura
 Per meterghe paura :
 La senta , Professor ,
 Sti bezzi no xe pochi , e i se ghe dona
 Col pato , la perdona ;
 Che da Nankin la vaga via al più presto .
 Tita , che nol voleva altro che questo ;
 Al Deputà l' à subito promesso
 De partir quel dì istesso ;
 E poco dopo in fato ,
 Per non mancar al pato ;
 L' è andà via ringraziando
 El Ciel de quando in quando , ma de cuor
 Che l' avesse concesso ai Nankinesi ,
 Come se vede in tanti altri paesi ,
 Per i propii Antenati tanto amor .

I D E B I T I

CAPRICCIO

PER NOZZÈ DELLA N. D. CAMILLA SAGREDO

COL NOB. SIG. FRANCESCO RASPI

Camileta - benedeta ;
Dei di nostri amiraziòn ;
Messa drento - in t' un Convento
Là ti à avudo educazion :
Mile cose - vantagiose
Là s' impara : chi nol sa ?
Solamente - no se sente
A parlar de Società .
Ti xe bela - ma putela ;
Le putele à da imparar :
Via te degna - che te insegna
Quel ch' al mondo s' à da far .
Ma cospeto ! - se me meto
Tuto a dir quel che se pol ;
La capisso - no finisso ,
Perchè un' Opera ghe vol ;
Ma a to' Pare - ma a to' Mare
Dir el resto lasserò ,

Che mi, Sposa, - d' una cosa
Sola e curta parlerò.

Se stimada - sempre e amada
I to' di ti vol passar,
Da ti stessa - date pressa
I to' debiti a pagar.

Le persone - che xe bone
Le xe atente a sto dover;
Xe inonesto - a ognun molesto
Chi no paga chi à da aver.

Ti sbufoni? - ti minchioni
Chi per ben t' à consegia?
Pur l' è vera! - su la Tera
Varii debiti se dà.

No te ofendo - che no intendo
Bezzi o zogo recordar.
Quei, oimei! - xe mo de quei
Che mi si me fa zurlar.

Ma ti, Dona - ti, Parona,
Ti un di Mare, e ancuo Mugier;
Quai doveri! - e quanto seri
Ai to' zorni ti à da aver!

Dona e Dama? - Aquista fama
De bon cuor, de urbanità
Co un contegno - de ti degno
Senza asprezza o vanità.

Ti Parona? - Siime bona
Con chi serve note e di,

Che anca lori - i Servitori
 Xe de carne come ti.
La to' Mama? - Tuti l' ama ;
 Tuti loda el so' bon cuor :
 Se la imiti - ti à i so' driti
 Su la lode e su l' amor .
Mare un zorno? - I fioli atorne
 Te starà con afezion .
 Camileta - da ti i speta
 La so' prima educazion .
Ti Consorte? - La to' sorte
 Da Chechin dipenderà ;
 Sii ubidente - compiacente ,
 E lu sempre t' amerà :
Se un maletto - el tien in leto ;
 Se un pensier mal lo fa star ,
 Con premura - ti procura
 El to' Sposo consolar :
Chi ben ama - la so' fama
 Sempre viva ga nel sen :
 Sia el to' Sposo - el to' moroso ;
 El to' amigo ; e andarà ben .
L' astu intesa? - t' ogio ofesa ?
 Songio un stolido , un minchion ?
 Gogio torto ? - pensio storto ?
 O piutosto ; goi rason ?
Ma Sposeta - benedeta ,
 Go mo' torto , e rason ti ;

Che sta storia - ti a memoria
Ti la sa meglio de mi .
Ti à talento , - e se 'l Convento
Sta lezion no t' à insegnà ,
Ti lezendo - e rifletendo
Da to' posta ti la sa .
Si perdia , - mi sbregheria
Quel che ò scritto ... e allora po' ?
Sta zornada - xe cantada
Da tant' altri . E taserò ?
No , no voggio ; - e po' no sogio
Quanto bona ti xe ti ?
Ti xe bona - e ben , perdona
Se ò mal dito , a dir cussi ;
Anzi aceta - Camileta ,
Anea el voto del mio cuor ;
Che i to' ani senza afani
Scora in braccio de l' Amor !

IL BOUQUET


OSSIA

M A Z Z E T T O

PRESENTATO AI NOBILI CONIUGI CONTI
GIOVIO DI MILANO NEL GIORNO INNANZI
ALLA LORO PARTENZA DA VENEZIA NEL MESE
DI GIUGNO 1817

DEL NOB. UOMO

NICCOLÒ PRIULI.



Za che avè fissà de andar,
E volè doman lassar
De Venezia le contrae
(Che pur tanto ve xe stae
De conforto e de alegria
Ne la vostra ipocondria (1))
Voi lassarve almanco un pegno,
De vu altri e de nu degno,
E per darve cosa rara
De Venezia, tanta avara
A produr erbete e fiori,
Voi donarve pien de odori,
Perchè in mente ne gabiè,
Un simbolico *Bouquet*.

Quel Casteli che mai straco (2),
Altro Pindaro, altro Flaco,
Pien de lena, senza stento
Tanto el core in un momento

(1) Alludesi alla perdita fatta dai Conjugi Giovio di un figlio unico, motivo per cui cercarono una distrazione nel soggiorno di Venezia.

(2) Spiridione Castelli.

Ch' el va quasi in braccio al Sol ;
Sarà un aureo *Gira-sol*.

El beligero Mengaldo (1)
Fato duro, fato saldo,
Ai furori de Gradivo
Ve presenta un *Sempre-vivo*.

El bel dir de l' Avocato (2)
Puro sempre e delicato,
In un *Giglio* troverè
Messo in mezo del *Bouquet*.

Quel Ancilo farmacista (3)
No sia messo tanto in vista.
Malinconico mestier
Sora ogni altro xe el Spezier ;
Ma sicome con bravura
L'erbe el studia e la natura
Per dar farmaco a ogni mal,
El sia un *Fior medicinal*.

E quel nostro Nicoletto (4)
Che ne dà tanto diletto
Quando el canto a l'improvviso
L'acompagna fin col viso,

(1) Cav. Angiolo Menegaldo. Fu de' pochi
che ritornarono dalla Campagna di Mosca.

(2) Jacopo Mantovani.

(3) Giuseppe Ancillo.

(4) Niccolò Streff.

Pien de inzegno pien de sal,
 Col palor sentimental,
 Ch'el ve par apena vivo,
 Lo gavè nel *Sensitivo*.

La fragranza più odorosa
 Spande a l'aria bela rosa;
 Abiè ochio nel tocarla,
 Contentève de vardarla.
 No s'à visto mai Zardin
 A dar rosa senza spin.
 Compatissi, son sincero;
 Ma sta *Rosa* ti è ti Piero (1):

E l'amabile Dotor (2)
 Che del tragico dolor
 Tanto apreza el mesto canto
 Lo gavè ne l'*Amaranto*.

Un Poeton de prima sfera (3)
 Che xe nato in altra Tera,
 Che pol star ardito a fronte
 Fin dei Mazza e Pindemonte,
 Sarà un fior, ma dei più rari
 A le Bele tanto cari,
 Se spogiarse el podarà
 De la solita umiltà.

(1) Pietro Buratti.

(2) N. U. Vittore Benzon.

(3) Giuseppe Bombardini.

Bombardini, onor del Brenta,
Un' *Ortensia* ve presenta .
- Ma sti fiori adesso colti
Mal starave cussi sciolti,
Donca el mazzo ligarò
E *Cordela* mi sarò .

F I N E

INDICE


| | |
|--------------------------------------------------|------------|
| <i>POESIE dell' Ab. ANGELO M. BARBARO . Pag.</i> | 5 |
| <i>LA MATRONA D' EFESO, Novella dello</i> | |
| <i>stesso</i> | 35 |
| <i>POESIE del N. U. MARC' ANTONIO ZORZI . .</i> | 47 |
| <i>L' IPOCRISIA, Satira del P. CACIA . . .</i> | 55 |
| <i>IL CIARLATANO, Novella di PIRRO TEOZZI</i> | 81 |
| <i>I DEBITI, Capriccio dello stesso Au-</i> | |
| <i>tore</i> | 96 |
| <i>IL BOUQUET, del N. U. NICCOLÒ PRIULI. .</i> | 103 |



COLLEZIONE

DELLE MIGLIORI OPERE SCRITTE
IN DIALETTO VENEZIANO

VOLUME XII. ED ULTIMO.



POESIE

DI

AUTORI DIVERSI


VOLUME DUODECIMO

VENEZIA

AL NEGOZIO DI LIBRI ALL'APOLLO

M. DCCC. XVII.

Dalla Tipografia di Alvispoli



PREFAZIONE


I Componimenti che si racchiudono in questo duodecimo Volumetto sono di quello stile dimesso che altri chiamerebbe schiesonico, altri barcarolesco, o plebeo, e che sono meglio di ogni altro a portata di godere della favorevole aura della moltitudine. Il vernacolo veneziano è ricchissimo in questo genere di poesie, e si sono negli scorsi tempi distinti fra gli altri un Paolo Britti ed un Santo Pigozzi. Anche tra i poeti di questo stile è poi surto il classico autore in Gio. Pozzobon, detto lo Schieson da Treviso, e venne finalmente a gareggiare con esso per fertilità di fantasia e per amena facilità il vivente Gio. Battista Bada, l'uno e l'altro autori di

opere impresse in parecchi volumi. Non dubitiamo che verrà bene accolta l'ultima nostra scelta, con cui noi intendiamo di dare compimento alla Raccolta di alcune delle migliori Poesie che nel dialetto veneziano si sieno scritte.

LA MOMOLETA

CANTATA

D' INCERTO AUTORE



LA MOMOLETA

CANTATA

Vardè là in quel Campièlo,
Cara siora Prudenza benedeta,
Chi xe quella siorazza spetenada
Che fa tuti quei sestì, e che camina
Con quel ninarse e quel bocon de mina.
— *La me par, se no falo, Momoleta.*
— Sì, sì, Momoleta, quella fia
De misser Zacaria
Che cerca, gramo, soto el Capitèlo
Tuto sgionfo le gambe e pien de mal,
E che un dì finirà za a l'Ospeal.
Varè, se Dio v' agiuta, mo no fala
Propio stomego e rabia con quel far?
L'è tal qual, da sioreta; con quei nei,
Con quel ninarse, co quel cotolin,
E tuta bianca come un calalin.
Varè; un che ghe fa i sberlefi,
L'altro che ghe varda drio; tuti ghe dise
Quel che po za so mi,
Anzi quel ch' i gh' à dito l'altro di.

Varè là el Frutariol , varè là el Gua ;
 Che tuti do' se fa le mile crose
 Che la vaga el davanti cussi nua .
 Uh povera petazza !
 Uh povera petegola monzua !
 Povera sporca , povera frascona ;
 E se mi fusse un omo
 Ghe voràve dir quel che finisse in pna :
 No la par più la gramazza
 Che una volta se vedeva
 Sbrindolosa andar per Piazza
 A cercar la carità .
 Chi diria che la xe quella
 Che quel dì che la viveva
 De polenta e de sardela
 Gera gran solenità ?

Epur xe vero , epur no le xe fiabe ;
 Tute l' à cognossua , tute saveva
 Cossa che la magnava e la beveva ;
 E adesso ? adesso la xe una Damòna ,
 La xe più che lustrissima ; la magna
 Sempre boca che vustu ,
 E la va a spasso , e la vive d' intrada ,
 E la lassa che diga la Contrada .
 La ga le zelosie
 Depente verdoline
 Co i so' cussinoni
 Butai fora ogni zorno dai balconi .

Drento in casa ; gran rasi ;
 Gran camera fornìa ,
 E gran camise che se supia via .
 Ve dirò questa , che una volta sola
 Ghe n'ò cusìo do' . . .
 Quanto sarà Tomasa ? ... sto Fevrer ,
 Nè mai più ghe ne cuso ;
 La voleva butarmele in tel muso .
 Apena la le à viste , l' à ma dito :
Siora Tomasa , m' avè mal servio ,
Nè queste xe camise da par mio ;
Varè che cusiùre !
E che rebatidure !
Spua fora ste pietine ;
No sta ben ti scoeti ,
I va come una bissa sti gazeti .

A sentir ste bagatele

Via l'ò trate tute do' ,
 Una a Mestre , una a Malghera ;
 Po gh'ò dito a verta ciera
 De so' Nona nina nana ;
 Chi l' à fata e chi la xe .

Ma no gh'è caso no , la xe cussi ,
 Custia ga fato sto bocon d' umor
 Dopo che la ga perso l' onor .
 Za parlo chiaro , perchè so che tuta
 La Ruga sa che no la ze più puta ;
 Senti , Comare , el digo , no per mal ,

Digo quel che m' à dito el sior Moleca
 Che xe un omo ... Che cade! el so gran mal
 Xe stada quella striga de so' mare
 Che ghe filava el lazzo,
 E che ancora, sta vechia carampana;
 La ghe fa mo da serva e da rufiana.
 Xe che ò un poco de giudizio
 E no voggio ancuo parlar,
 Perchè mai quel bruto vizio
 No go buo de mormorar.

Epur quella fraschetta no xe bela,
 Ca' de Diana de dia,
 E l' à dito anca un di dona Maria.
 Ben la xe nata co la camiseta
 Perchè la ga trovà
 Quel panimbruo che se gh' à incapricià.
 La xe longa e sotila che la par
 Tramada a un fil de vento e de caligo;
 La dopera, per farse molesina,
 Una certa manteca de castrà
 Che ghe lassa un odor che tuti sente
 Chi che passa, o se ghe senta arente;
 La xe un bezzo de asse,
 Un soldo de formagio o de saon;
 Una roca impontia, un canachion;
 La se rada i mustachi,
 La ga le carne come le lasagne;
 I peti tuti pori,

Cariolai de soto e sora maluguali ;
 E fiapi più dei vostri e più dei miù ;
 El dreto è grandò quanto xe un melon ;
 El zanco è picoleto come un pomo ;
 Dirè come ch' el so? da un Zentilomo ;
 De soto, semo senza carne adosso ;
 E i omeni vol polpa e no vol osso .

 Che sesto ! che ciera !

 Che naso ! che vita !

 Che denti ! che boea !

 Che brazzi ! che man !

 Saràve seguro .

 Quel Sior , se anca sola

 Per Piazza la andasse

 Infin a doman .

Ma pazienza , Sorela ,
 Che no la fusse bela ,
 Basteria che la fusse
 Manco afetada ; perchè a l' ocasion
 La zura sempre : *Da quella che son* ;
 E quando che i ghe cava el capèlo
 La fa la boca streta ,
 E la ghe dise : *Serva* ,
 Con quel esse sutilo , che la par
 Giusto un schizzeto al cul co l' è a sbrufar .
 Se i ghe dà del tabaco
 La lo tiol prima in punta de piron ,
 Po la ghe supia via tuto quel poco .

Che resta tacà ai dei ,
 Come che porta de le volte el caso ;
 Per no imbratarse , Dio se guarda , el naso ;
 E in ultima la finisse , o la stranua
 Per dirghe un' altra volta : *Serva sua* .

Benchè ò le cotole
 Però credèmelò ,
 No conto frotole
 Ma verità ;

E se parlessimo
 Fin ancuo quindese
 No ariveressimo
 A la metà ,

Savè che go do' Pute
 Che no ze gnança brute ,
 Ma che no xe per imaginazion
 De la natura de sta zente da bon .
 Una xe Venturina
 Che fa la Colarina ,
 E che con quele benedete man
 Fa di e note fature al Sior Piovan .
 Questa ga sempre la so' pignatèla
 Calda , e co drento de la cola assae ,
 Perchè la serve de le gran Casae ;
 La ga verto botega , e drento e fora
 Ghe va volentierissima la zente
 Perchè i sa che la xe Puta prudente .
 L' altra xe Vica , e la xe un bel seston ,

Un toco de biancona ;
 Ma che so' Siora Santola Barbiera
 Vorave farla andar per Cameriera ;
 Ma no voggio sicuro
 Perchè so che in ste case
 (E ve lo pol ben dire mio Compare)
 Ghe ne toca a provar sempre de amare ;
 Bisogna che le fazza quei mestieri
 E quele stente che no xe da Pute ;
 Bisogna che le sia sorde , orbe e mute ,
 Assae furbe ; e che le tegna
 In stomego da cento bisinèle
 Che se le palesasse ghe anderia
 Mi no so cossa , oltre el cazzarle via .
 Ma , Sorela , quel che più me despiase
 Xe che spesso e spessissimo le fala
 O per gnente , o per poco
 Co quei servitorazzi sfondradoni ,
 Che al strenzer de le strope
 Tuti i gran petoloni salta fora ,
 E i scampa a l'improvviso e i va in malora ;
 E in fin quele gramazze ,
 Strazzae de sora e rovinae de soto ,
 Le ve torna po' a casa col fagoto .

Cussi no fusselo

Per quella zovene

Che so po' mi ;

E no gavessela

Da recordarselo
E note e di!

E cussì, per ste cosse,
Vica voggio con mi; e se quel Sior
Che vien per casa nostra, e che xe fio
Del primo mercanton de Marzeria,
Ghe dà per carità tuto el bisogno,
E ghe manda ogni zorno el pan e 'l vin,
No gh'è malizia, nè secondo fin;
E se lasso che i vaga, povereti,
Soli in Piazza e ai Casoti el Carneval;
Mi son sicura che no ghe xe mal;
E se ghe tira dreto el so negozio,
Come gramo lu spera,
Chi sa che un dì nol ghe meta anca la vera!
Comare, per parlar de ste mie fie
Squasi mi son andata
Fora de carizada,
Nè v'ò contà de quela sporca el megio
Ch' i ga fato una volta in Canaregio;
Ma se volè saver tuta l'istoria
Sin dal principio al fin, col con e 'l ron;
Ve menarò doman Siora Vitoria.
Vago intanto da basso, che ò sentio
A sonar Nona, e aspeto mio mario.

Questi xe i Pater nostri, e le Corone
De ste maledetissime Donete.

Ma , care le mie Done benedete ,

(Parlo co quele che xe nate ben)

Credemelo dasseno ,

Che de sto parlar beco coràù

Ghe n'è che se deleta anca fra vu .

Xe pur vechio quanto un sasso

Quel Proverbio che ne dise:

Varda , tasi e no parlar .

Godè pur, andè, stè, fè ,


Ma lassè che tuti fazza

Tuto quello che ghe par .

SONETTI X.

DI

TATI REMITA





L'anagramma di *Tati Remita* è *Tita Merati*, e l'Autore di questi Sonetti era D. Giambattista Merati veneziano, che fiorì poco dopo la metà del secolo scorso, e che visse riputatissimo Abate della sua Religione de' Monaci Benedettini di s. Giorgio. Abbiamo di lui alle stampe i *Saggi Metrici*. In Venezia, per il Deregni, 1763-65 in 8vo, i quali formano un'ampia raccolta di Sonetti nel dialetto veneziano, di argomenti per la maggior parte filosofici o morali, e somiglianti ai Caratteri di Teofrasto, cioè diretti a regolare i sociali costumi. Ottima è stata l'intenzione dell'Autore, ma le sue Poesie mancano affatto di gusto e di spirito, nè si possono commendare che per molta facilità. I pochi Sonetti seguenti sono tratti dall'Opera sopraccennata.

[Faint, illegible text, possibly bleed-through from the reverse side of the page]

IL VERO BARCAJUOLO VENEZIANO

Intender l' aqua ; viver a zornada ,
 Voga destesa senza spesseggar ,
 In tel stretto del rio no se ligar ,
 Per no far gropo dar la so' siada ;

Coi omeni d' onor far camerada ;
 Ai tressi curte, tuti saludar ;
 Star su la defensiva , e no bravar
 Senza rason per no far mai bulada ;

Tratar ben la mugier , dei fioi grandoti
 No far che la dotrina sia el batèlo ;
 Esser secreto e no far zo merloti ;

Che no diventa el Magazen Tinèlo ;
 Nè cassa el Ghetto , nè sansughe i loti ;
 Questo xe 'l vero Barcariol. Cerchèlo!

LA CONVENIENZA

La Natura no manca, manco mi ;
 El mondo no se mua, mi m'ò muà ;
 Tuto finisse ; el senso cariolà
 Esclama, per no dir: no posso pi.

La xe, xe stà, e la sarà cussi
 Da dopo che sto mondo xe creà ;
 El zovene de tuto goderà,
 El vechio ruzerà la note e 'l di ;

La moda ; che se mua, la torna ancora
 Dopo fata la so' circolazion ;
 Gh'è 'l rico perchè gh'è chi va in malora.

Maravegiarse d'ogni mutazion,
 Criticar sempre, no star quieto un' ora
 La me par da misantropo c

L' UMANITA'

Tuto me fa tremar; basta un sorzeto
 Che se faccia sentir, no dormo più;
 Al morto, al ton, a l'urto, à l'oh, a l'uh
 Palpita el cuor, e se me sera el peto.

Che giova aver assae leto e riletto,
 Se in pratica po' va col culo in su
 Le acquistade nozion? Le serve a nu
 De solo filosofico dialeto.

Misera umanità! Altro ghe vol
 Che stoiche, che academiche bravure,
 Chiamar quiete el morir, feral el Sol!

Co' semo al ponto, ste nostre colture,
 Che tanto qua se stima e che ne pol,
 Ne fa più porchi de le altre creature.

IL VENEZIANO ALLA CAMPAGNA

El Venezian quando in Campagna el va
 L'à bagagio per tute le stagion,
 El passa la laguna col barcon,
 Co l'è a tera l'è tuto consolà.

Avanti che la Cubia sia tacà
 El paga; el basa, el cria, e in confusion
 A caro prezzo el vol far provision
 De tuto quel ch' el vede e quel ch' el sa.

El marchia come che i ghe dasse drio;
 Nol vede l' ora a casa de arivar;
 Co l'è arivà el gusto xe finìo.

El disna, e se nol trova da ziozar,
 Dopo aver spassizà, fumà, dormio,
 El shadagia, e nol sa cossa più far.

IL POETA

Me seca molto certi laureati
 Co i se mete a parlar de la Poesia,
 Chi dise: Per un bezzo la daria,
 Che i versi de parole xe barati;

Chi dise: L'è un mestier da zovenati;
 Chi me dise: L'è un tempo butà via;
 Chi: La xe una solenissima pazzia,
 Che xe i poeti tuti quanti mati.

Chi la fa de le scienze la corona,
 Madre de l'estro e del divin furor,
 Domatrice dei barbari, o patrona.

Mi digo: Xe el Poeta un ligador;
 Se la zogia xe falsa el ve cordona;
 Se la xe bona el ghe cresce el valor.

LA MODESTIA

Saver, e superar quella passion
 De voler che se sapia che se sa,
 Xe una virtù che pochi doti ga
 Perchè la sepelisse l'ambizion.

Astio, possesso, invidia, presunzion,
 Par i carioli de l'illuminà,
 Che ghe va rosegando l'umiltà,
 E con quella el conceto e l'opinion.

Nobiltà con coltura e tere e pezzi
 Xe un gran brillante d'aqua bela e fondo;
 Sola, xe un crestalon ma tuto in pezzi.

Senza modestia un spirito profondo
 Scuode, in vece d'onori, odj e disprezzi
 Con quella l'è stimà da tuto el mondo.

LA TESTA VUOTA

Voler componer con la testa voda
 Xe voler travasar col fiasco sbuso ;
 Voler parlar col musariol al muso ,
 Senza drapo voler tagio a la moda ;

Senza carne voler grassa la broda ,
 Senza scala voler andar dessus ,
 Voler impiar l' ago senza buso ,
 Voler ficar el chiodo in te la croda .

Me ne rido de quei che me dise :
Basta voler per poder far de tuto ;
 Co no gh' è fassi no se fa cenise .

Co no gh' è l' anemal no gh' è persuto ;
 Albero no se dà senza raise ;
 Co no gh' è intrada se se trova al suto .

IL VERO REGALO

La puina smalzada del Pastor,
 Tagio de lai sutilo del Becher,
 El figà in ponto del Luganegher,
 Se i regalasse e ghe vedesse el cuor,

I stimo più dei doni del Signor,
 Anca ch' el ve donasse el so deser;
 Che la diventa paga del mestier
 Co 'l ve tiol per virtuoso o per dottor.

Al regalo no xe la qualità,
 Xe la maniera, l'ocasion, el fin,
 L'animo grandò che prezzò ghe dà.

Quatro vovi che dona un Contadin
 Assae più val (co' no l'è interessà)
 De un anelo de qualche Palatin.

IL VERO DOVERE

Sto rustego ghe zelo , sto strambazzo
 Che no insegna la strada co 'l la sa?
 Che nol lassa tior lume co 'l la ga?
 Che a chi xe per cascar no sporze el braccio?

Che consegnar no voglia quel gramazzo ,
 Col pol , che lo sconzura e xe intrigà?
 Che l' aqua a chi ga sè abia negà?
 Che per la vista tior alza el palazzo?

Tuto quello che senza pregiudizio
 Se pol comunicar , mi stimerò
 Ch' el sia dover piutosto che servizio .

Se a le Romane istorie crederò :
 Che gera el più teribile suplizio
 Interdir l' aqua e 'l fogo ve dirò .

L' AFFETTAZIONE

Gh' è dei omeni adesso a la toleta
 Con manteche, con stuchj, con peneli,
 Con ferì in fogo da scotar caveli,
 Che polvere se dà co la moreta.

Li burla più de qualche femeneta,
 Tiolendoli per musici o puteli;
 E la sa che quando no gh' è pelà
 No ghe xe mai virilità perfeta.

No voggio l' omo tanto efeminà,
 Nè ch' el me spuzza da salvadeghin,
 Ma el decoro viril sia conservà.

Se chi recita, se anca Trufaldin
 Studia de no dar segni d' afetà,
 Tanto manco li daga el Citadin.

P O E S I E

DI

GIOVANNI POZZOBON

DETTO

SCHIESON DA TREVISO

NOTIZIE DELLO SCHIESONE

Giovanni Pozzobon nacque da onesta gente in Trevigi a' 10 di agosto 1713. Fu collocato da giovanetto nella Stamperia Conzati di Padova, da dove si restituì in patria nell'anno 1744. Obligato ivi a procurarsi i mezzi di sussistenza si dedicò all'arte libraria, senza però abbandonare la cultura dello spirito, e soprattutto la Poesia cui era dalla natura inclinato. Pubblicò il suo primo Pronostico col nome del *Schieson Trevisan* nell'anno 1744, e continuò poi sin ch'ebbe vita a darlo annualmente a luce. Tanto piacque questo popolare libretto che ne vennero impressi da 40 sin a 80 mila esemplari per anno. Il Pozzobon prese moglie all'età di 53 anni, e n'ebbe tre figliuoli. Cessò di vivere a' 10 di luglio dell'anno 1785.

Era di serio contegno, ma nel tempo stesso lieto e gioviale. Nelle sue produzioni si trovano buoni morali insegnamenti, giammai contraddetti da verun' espressione sfuggitagli in offesa della Religione o della decenza. Dilettavasi di Pittura e di Nummaria, ed era riuscito a formarsi una raccolta di medaglie, sì romane che del medio evo. Dopo la sua morte furono raccolte tutte le sue Poesie, e stampate in *Padova*, per *Carlo Conzati*, senz' anno, ma nel 1788, e segg. in 5 volumi in 8vo. Da questa faraginoso raccolta abbiamo tolto le pochissime cose che qui pubblichiamo in attestato di riverenza ad un nome benemerito del vernacolo delle Provincie Veneziane.

DIFFICOLTA' DELLO SCRIVERE VERNACOLO

El par che sto mio stil facile el sia,
 E che scriva le rime come che
 Le me vien su la pena. La falè
 Se credè questo; se' anzi in eresia;

Che ghe xe el so' difficile, per dia!
 Molto più assae de quel che suponè.
 Provève mo anca vu; e vedarè
 Se verità mi digo, opur busia;

E se mo sto mio verso è natural,
 Andante, e che no par gnente pensà,
 Provo molta fadiga a farlo tal.

A far facile la difficoltà
 Bisogna aver in zuca un po' de sal,
 E lo giudica quei che ghe ne sa.

UN SOGNO

Cara Calina mia , son insognà
Una cossa che a dirla me vergogno ;
Son insognà (ma al fin l'è stato un sogno)
Che mi con vu me gera maridà .

Ma l' uno e l' altro gera desperà
Per aver fato sto grosso codogno .
Da una banda gavevimo el Bisogno ,
E da quel' altra la Necessità .

Scontenti, malinconichi, afamai ,
Ogni dì sempre più l' andava mal ;
Mocolavimo come renegai !

E senza bezzi e senza capital ,
Pieni de cuche , de miserie e guai ;
Alfin semo redoti a l' Ospeal .

Se sto sogno bestial
El se verificasse , che nol so ,
Staremmo pur freschi tuti do' !

LA DICHIARAZIONE

Che bisogno ghe xe dissimular?
V' amo, Cate, nol nego. È fursi mal
Amar come che va? Se deve amar
Con purità e con amor cordial.

Vardève da un ingrato e disleal,
Da un che v' ama solo per burlar;
De un amor inocente e amor leal
No se se deve gnente vergognar.

Se v' amo? no lo nego; e de dì in dì
El mio amor va cressendo sempre più;
Ma fazza Dio quel che xe destinà.

Mi temo molto, o Cate, in verità,
Temo che vu, oh Dio! no fè per mi,
O per dir meglio, mi no sia per vu.

LA RITROSIA

Voleu saver perchè, Cate careta,
 Tanto me de' in tel genio, e me piase?
 Oh ve lo dirò mi, se nol savè;
 Sol perchè savè far la ritroseta.

Quel mostrarve modesta e sdegnoseta,
 Quel sprezzar quel che forse più bramè,
 Quel saver dir: *Sfazzà, no me tochè,*
 Cosse tute le xe che assae me aleta.

Se una Puta vanzar vol qualche cosa
 Sora un bon Zovenoto inamorà,
 No ghe xe meglio che far la ritrosa;

Ma quando po che a sguazzo la se trà,
 Nè sa, nè vol far la vergognosa,
 Zo dei calcagni al moroso la va.

Questa xe verità:

La vostra mercanzia no val un bezzo;
 Ma col negarla la fè star in prezzo.

INVETTIVA CONTRO LE DONNE

Volubili, incostanti, menzognere,
 Interessade, vane, sospetose;
 Chiacarone, ostinae, lusinghiere,
 Impazienti, sprezzanti, maliziose,

Aroganti, implacabili, severe,
 Inganevoli, astute, pontigliose,
 Incoregibili, tenaci, fiere,
 Importune, superbe, dispetose;

Che no ga per gnessun fede nè amor,
 De cervelo lisier come xe un' oca,
 E d' ogni nostro mal vera cagion.

Cussì contra le Done un gran dottor
 Esclamando l' andava a piena boca;
 E ghe respondeva l' Eco: *Oh che c.....!*

LA SCELTA DELLA MOGLIE

El maridarse in una che sia bela ;
A chi nol sa , la par consolazion ,
Ma chi del mondo sa qualche novela
I tien diferentissima opinion .

In fati a una muger come una Stela
Da mile ghe vien fato osservazion ;
E ancuo sofri sta cossa e diman quella ,
L' è po' facile a dar qualche sbrisson ;

Però vu , amigo mio caro , che se'
Per entrar presto drento de sta Scuola ,
Vardè ben , caro vu , come che fè .

Bela , sior no , ma una prudente fiola ,
Onesta e savia vogio che trovè ;
Che questo è quello che v' à da far gola :
La belezza la svola ,
E chi cerca beltà senza vertù
Cerca un lazzo che 'l pica e gnente più .

PER SPOSALIZIO

Diga pur chi vol dir, che 'l sia un intrigo
El maridarse, che, a schieto parlarve,
Legiadra Zentildona, mi ve digo,
Che otimamente ben fè a maridarve;

Anzi ve lodo, anzi ve benedigo;
E se podesse voria imortalarve;
 (Compati l'expression) parlo da amigo,
Spero che no averè grama a chiamarve;

E se mi no me son mai maridà,
Più d'una volta à portà el caso, che
Del minchion per la testa me son dà.

È vero che nel Matrimonio gh'è
Contese, desunion, contrarietà,
Ma tute schiopetade alfin no l'è;
E po lo vedarè
Col fato, che a deventar Consorte
Se ghe ne prova un poco d'ogni sorte.

DISGRAZIE DE' MARITATI

Se tuto quel che se razira in mente
 Un povero ragazzo inamorà
 Sul fior de la passión fervida ; ardente
 El succedesse co' l' è maridà ;

Che val a dir (per dirla brevemente)
 Gioje , delizie , pase , fedeltà ,
 Mo allora el maridarse certamente
 La saràve una gran felicità !

Ma che ? spesso intravien nel Matrimonio
 Giusto de quel che no se pensa mai ;
 Desgrazie , malatie , torti , despeti ;

E allora in mezo a tante beghe e guai ,
 E la coda metendoghe el Demonio ,
 L' è un viver da sassini maledeti ;
 Onde sia benedeti
 Chi no s' intriga , che a la fin dir sento ,
 Che la Mugier xe a l' omo un gran tormento .

RACCOMANDAZIONE DEL MUSEO DELL'AUTORE
AL P. MANDELLI

Degno Padre Prior, quando che vu
No m' agiutè, son mezo desperà'.
El mio Museo da l' ano scorso in qua
De pochissimo gnente el xe cressù.

E le Medagie costa qua da nu,
E mi spender no posso, son spiantà;
Go bensì el cuor e go la volontà,
Ma me manca de quel che importa più.

Però con discrezion; come convien,
Ve ne domando quatro civilmente
De quele che da vu dopie se tien.

Mi adesso ò trato el sasso destramente;
Se 'l colpo me va fato, ben con ben,
E se no, reputemo no sia gnente;
Ma so infalibilmente
Che o poche o trope men vorè donar,
Che 'l solito è de vu, no farve star.

PER LA MORTE D' UN FIGLIUOLO
DELL' AUTORE

Me xe morto un putin ! Morte sassina
In pochissimi dì me l' à robà
Ai diese Zugno de l' ano passà
Da una tosse ostinada e malandrina .

Se m' à portà via el cuor sta creaturina,
Se ò pianto la mia parte e sospirà,
Lasso che chi xe tenero papà,
Senza che mi ghel diga, l' indovina .

Ma rifletendo a le disposizion
De l' Eterna Infalibile Sapienza,
E che una vale de miseria è questa ,

Ai Decreti del Ciel sbassà ò la testa,
Me son armà de santa soferenza ,
E ò dito: Signor mio, vu se' el Paron ;
E cussi ne le aflizion
Altro conforto no se trova al fin
Che rassegnarse al gran Voler Divin .

EPIGRAMMI

I. *Il Consulto*

Sior Schieson, un Consulto. A un certo tal
Certi no so che bezzi mi ò da dar;
Son povaromo; i fati mii va mal;
Come possoi mo far a no pagar?
Vèla a la granda, amigo, prometè,
E a la promessa po' no ghe atendè.

II. *L'Amor proprio*

Co una ragazza se vede dar 'na ochiada
Da qualche zerbinoto Paregin,
Subito crede vegnir domandada,
E la camisa no ghe sta al martin;
Ma s'anca el sior Schieson fusse una tosa
El credaria anca lu la stessa cosa.

III. *Il Vecchio innamorato*

Co un pie in te la fossa Crasitèo,
E con el viso tuto incresponà,
Fa ancora a più poder el cicisbeo.
Povero cuco, ti me fa pecà!
Amor (e questo è Schiesonian aviso)
No gabia in cuor chi no lo ga in tel viso:

IV. *Il Debitore*

Se maravegia un tal , perchè a passar
 Mai nol me vede per contrada Bassa :
Ma no ti sa, minchion, che là ò da dar,
E dove s' à da dar mai no se passa?
 Un debitor sta fiera pena, el ga
 De no poder zirar con libertà.

V. *La Mercanzia esibita*

Va in cerca un tal de vender mercanzia ,
 Epur nol trova chi ghe daga un bezzo .
 No aver pressa , minchion , de darla via,
 Che ad esibirla se ghe tiol el prezzo ;
 Se fa come le Done : la se nega ,
 Che allora po' d' averla ognuno prega .

VI. *La Fortuna*

Quando la sorte no se ga contraria
 El so anca mi che se par omenoni ;
 Ma quando , come a mi , la xe avversaria
 Se vien giusto stimai tanti talponi .
 Quanti ghe n' è che perchè i è poveromini
 No i vien gnanca credesti galantomini !

VII. *Il buon esempio*

Se 'l Pare tuto 'l zorno alegramente
 Tripudia a l' Osteria, zioga, scialaqua,
E chiapa le so' bale bravamente,
 Cossa voleu che 'l fio beva de l' aqua?
 Per educar de sesto fioli e fiole
 Bon esempio ghe vol e no parole.

VIII. *Il Guercio e il Gobbo*

Un Sguerzo una matina s' à incontrà
 In t' un Gobo, e cussi el lo à burlà:
Ti è ben cargo a bon' ora sta matina.
 El Gobo gh' à risposto: *Poffardina,*
Bisogna che a bon' ora sia per certo
Perchè ti no ti ga che un ochio averta.

IX. *Vanto d' una Moglie*

Una Mugier la se vantava un dì
 Ch' i ghe disea minchion a so' Mari.
 Un' altra gh' à risposto: *Oh cara amiga,*
Tasè che a farlo tal no gh' è fadiga.

Morte d' una Moglie

La Consorte d' un tal se sepeliva ;
 E so Mario cantava ch' el rapiva :
 Gh' è sta dito ch' el tasa , che nol par
 Bon in sto dì tanto alegro a cantar .
Oh bela , l' à risposto , se ai me di
Tanta alerezza no ò mai provà mi !
 Se fusse maridà , quando la mia
 Morisse , mi certo canteria .

X. La Moglie affogata

S' avea in t' un fiume una Mugier negà ,
 El Mario , poverazzo , desperà
 El l' andava pescando atentamente
 A l' incontraria d' aque del torente :
 Gh' è stà domandà : *Perchè cussì ?*
 E lu à resposto : *El perchè el so ben mi :*
Viva l' à sempre fato a la roversa ,
Morta , no l' averà l' usanza persa ;
Ond' è pià facil che la trova in suso ,
Za che de contrariarme l' avea l' uso :

XI. *Il Millantatore*

Un tal se dava vanto, e si 'l disea;
 Che tute drio le Done ghe corea:
Gh'è sta risposto: *Oh questa pò se sa*
Che drio 'l pezo le Done sempre va.

XII. *Peso della Moglie*

Da borasca in pericol se trovava
 Una nave che gran pesi portava:
El Piloto à ordenà che ognnn dovesse
 Trar via 'l peso più grandò che l'avesse:
Uno de quei che avea là so' Mugier
 De butarla in tel mar fava pensier:
Ghe xe stà domandà: *Perchè cussì?*
 — *Perchè l'è 'l peso più grandò che go mè.*

XIII. *Virtù senza denari*

Certo che sì, che a ben pensarghe su
 La più bela ricchezza è la Vertù!
Epure apresso el mondo un omo povero;
 Per virtuoso ch' el sia, l'è sempre un rovero.

XIV. *Le Donne*

Chi de le nostre Done dise mal
 El comete un eror molto bestial :
 Se 'l Cielo è vago per le vive Stele,
 Lo xe anea el mondo per le Done bele .

XV. *Il Vestito immodesto*

Quando una casa coverta no xe ,
 La mostra de poder star poco in piè :
 Cussi la Dona che descoverta vada
 Par che la voglia far qualche cascada .

XVI. *L'Imprudenza punita*

Una Dona burlava un certo Pulo
 Che gera moro : *Ti è un gran corvo brutto!*
 E questo che xe qua placidamente
 Gh' à resposto cussi a sta imprudente ;
I Corvi core drio a ogni carogna ;
Che ve vardè da mì donca bisogna :

XVII. *Rimedio contro l'Amore*

Da certa zoventù de prima età
 A un filosofo gh'è stà dimandà,
 Quale sia quel remedio che più val
 Per far guarir quei che d'amor ga mal;
 E lu à risposto: Che la fame sola
 Xe 'l remedio che fa che Amor ghe mola;
 E in fati, poffardio, co se ga fame
 Se ga altro in mente che d'Amor le brame.

XVIII. *Storia di Rodope*

Rodope, fia de Dario, fè amazzar
 La propria Nena che l' à bua a latar
 Solamente perchè la ghe criava
 Che a maridarse no la se curava.
 Ai nostri zorni, oh quante fie de Dario
 Faria mazzar le Nene a l' incontrario!

XIX. *Fragilità della bellezza*

Vedeu sta brutta vechia che xe qua?
 A i so' di la ga molti inamorà,
 E adesso che la xe canùta e grima
 No la trova nissun che più la stima:
 Done bele, tiolè esempio da questa,
 E moderè quel fumo che avè in testa:
 Va la belezza come che va el lampo,
 E, vechie, no ve resta apena el stampo!

XX. *Arguta risposta*

Un certo paesan gavea un cavāl
 Longo e magro che pareva un feral:
 Un ghe domanda: *A quanto al braccio*
Vendaressi sto vostro cavalazzo?
 E lu, alzando la coda con disprezzo:
Entrè in botega che farò bon prezzo.

XXI. *Risposta d'un Guercio*

Un certo tal che un ochio sol gavea,
 Ma che de furberie ghe ne savea,
 Con un ch' i aveva tuti do' à scommesso,
 Chi de lori ghe vede più da presso.
Per Diana, dise el Sguerzo, ò venzo mi;
E vustu veder se la xe cussi?
Mi do' ten vedo con un ochio sol,
E ti con do' vederme un sol ti pol.

XXII. *Moglie colerica*

Quando che la Muger sussura in casa,
 Aciò che la se quieta e che la tasa
 Il remedio xe questo d' esperienza:
 O corer via, o armarse de pazienza.
 Chi à giudizio mai fissa un' opinion
 Con chi no xe capace de rason.

XXIII. *Un Debitore*

Gh' è un debitor che se vol lamentar,
 Che Quaresema longa assae ghe par.
 Ch' el paga a Pasqua chi pagar el deve,
 E la ghe parerà anca tropo breve.

XXIV. *Un Amante avaro*

Un avaro a una tal l'amor facea ,
E con parole amare el la ponzea ;
E po' el se ne dolea , sto bel umor ,
Che no l'avea fortuna a far l'amor ;
Se fortuna in amor volè trovar
Ve bisogna una cosa , amigo , far :
La seradura che a la borsa avè
Su la boca convien che ve metè .
Amor vol splendidezza e cortesia ,
E no vol avarizia e vilania .

C I N G A R E S C A

L'ASTROLOGO

Fermève, viso d' oro ,
 Fermève , bela Puta ,
 Che ve contempla tuta
 Un pochetin ;
Vedo che avè un sestin .
 E de la grazia tanta ,
 Grazia che propio incanta
 E liga i cuori ;
No xe da far stupori ,
 Come faria un Sofista ,
 Se cussì a prima vista
 Me piase ;
Bisogna che sapiè ,
 E chi è che nol sa quele ?
 Che le cosse ch' è bele
 A tuti piase .
Benedete le case
 Che ga de ste zogièta .
 De ste care cossete
 Come vu ;

Più che ve vardo , e più
 Ve scovro un trato degno ,
 Ch' al certo passa el segno
 E che no è in uso .

Oh caro quel bel muso ,
 Cari quei bei ochieti ,
 Che sièli benedeti
 Dove i varda !

Quela ganassa sguarda ,
 Quel fronte relusente ,
 Quela boca ridente
 E singolar !

Me piase el vostro far ,
 Me piase el vostro sesto ,
 Un far ch' à del modesto
 E del furbeto .

Un cuor vu gavè in peto
 Che a la fisionomia
 Xe tuto cortesia
 E senza orgoglio .

Mi strolegar ve voglio ,
 Se vu volè però ,
 E ogni cossa dirò
 Che sarà vera .

Animo , bela ciera ;
 Animo via , pian pian ,
 Dè qua , dème la man ,
 E ben slarghèla .

Che cara Puta bela ;
 Vu me vardè e ridè ;
 E fursi no credè
 Che mi indovina ?

Oh che man molesina ,
 Rotondeta , palpabile ;
 Oh che manina amabile
 Ch' è questa !

Sta linea manifesta
 Che gavè un far grazioso ,
 Un far che xe amoroso
 Verso ognun .

No avè defeto alcun ;
 Ma se' tuta bontà ;
 Co un cuor ch' à la pietà
 Molto l' inclina .

In fin da picolina
 Spiravi grazia e amor ;
 E ve lassava el cuor
 Chi ve vedea .

E quanto in vu cressea
 I ani , cressea ancora
 Quel trato ch' inamora
 E che avè adesso .

So che se' stada spesso
 Da più d' uno bramada ;
 Tanto vu se' stimada ,
 Mia careta !

Sapiè , Nina diletà ;
 Che gh' è un zoveneto
 Che scolpia in mez' al peto
 Lu ve tien .

Se a questo vorè ben ,
 Nè a altri badarè ,
 Credèlo , passarè
 Bona fortuna .

Molto poche , o gnessuna ,
 A un fare giudizioso
 E d' un solo moroso
 Xe' contente ;

Ma vu , che se' prudente ,
 E ch' avè un cuor de late ,
 No sarè de ste mate
 Gazarae ,

Che alfin resta burlae
 Col far l' amor a tanti ,
 E in ultima i so' amanti
 Po se stufa ;

Onde le fa la mufa ,
 E stà ligade al palo ,
 Che ognuno ghe fa 'l balo
 De l' impianto .

La costanza xe el vanto
 Che una Puta aver deve ;
 Donca vu regolève ,
 E siè costante ;

No stè badar a tante
 Promesse che fa i Puti ,
 Perchè promete tuli
 E pochi tende .

Chi d'Amor se n'intende
 E sa quanto ch'el possa ,
 No casca in te la fossa
 Facilmente .

Ve prego , tegnì a mente
 El me parlar sincero ,
 Che mi ve digo el vero ,
 E vere cose .

Quando de farse Spose
 Certune à fissà el chiodo
 Le vol far a so' modo
 In ogni via ;

E per quanto ghe cria
 Le mare e i pari , oibò ,
 No le se tol no zo
 Dal so' pensier ;

A deventar mugier ,
 Lo crede ste meschine ,
 De deventar regine .
 Oh poverazze !

Tante pessime razze
 Gh'è d'omeni a sto mondo
 Che no gh'è fin nè fondo
 A dirle tute .

Quante povere Pute
 Le incontra in dei Marii
 Che i se chiama pentii ;
 E de che sorte !

E a la grama Consorte
 I te ghe volta quello ,
 E i cerca del bordelo
 In altra parte .

Con altre i fa le carte ,
 Se ben i è maridai ;
 E la Mugier sta in guai ,
 Sospiri e pianti .

Oh quanti mai , oh quanti ,
 La note i le carezza ,
 E 'l di co indiscretezza
 I le strapazza !

Quanti avari de razza ,
 Per no spenderghe e farghe ;
 I lassaria mostrarghe
 In fin el Q !

E qualche turlulu
 Che zelosia po ga ,
 Sempre ghe sta tacà
 Soto le cotole .

Queste no le xe frotole :
 Perchè vòì che sapiè ,
 Che de tristi ghe n' è
 Più che de boni .

Le in cōtra in dei baroni
 Che ghe magna le dote,
 Che ghe dà de le bote
 E le maltrata;

Ora i ghe dise: mata,
 Ora i la maledise,
 Ora bruta i ghe dise;
 E qualcoss' altro.

Tropo contrato scaltro
 Adesso è 'l maridarse!
 Va a gara d' oselarse
 Sposa e Sposo.

Quel tal xe fior pietoso,
 Xe fior savio e modesto,
 Xe sparagnin, xe onesto
 E ritirado;


Ma dopo maridado
 Ecolo un scavezzon
 Discolo e tripudion
 Fora dei modi.

Quel altro è uno dei sodi,
 No à pratiche cative,
 Mezo chietin el vive,
 Oh che bontà!

Ma dopo acompagnà
 L'è un vero magazen
 De vizj colmo e pien,
 E trista cola;

E la povera fiola ;
 Se no l' è rassegnada ,
 Cussi mal intrigada ,
 L' è in galia ;
Donca , mia bela fia ,
 Vu che gavè giudizio
 No fe' mai per caprizio
 Sto gran passo .
Quante per puro spasso
 Ghe n' è che s' acompagna ,
 E po dopo le magna
 El pan pentì !
Vu no farè cussi ;
 Al Ciel racomandève ,
 E in tuto remetève
 Al so' voler ;
Si , se volè goder
 Contenta contentissima
 'Na vita felicissima
 E beata .
Dona , Puta garbata ,
 E degna d' ogni ben ,
 Pensèghe suso ben
 Che v' ò avisà .
Sto passo che xe qua ,
 Onde no scapuzzar ,
 Certo convien pensar
 Prima de farlo .

Orsù , altro no parlo ;
Capi , se avè cervelo ;
Caro quel muso belo ,
A revederse .




P O E S I E


DI

GIAMBATISTA BADA

E DI ALTRI



Alcune di queste Poesie sono tolte dal Vol. IV della stampa fattane in *Venezia*, per *Adolfo Cesare*, 1800 in 8vo, ed altre ci sono state gentilmente favorite dall'Autore stesso, e veggono ora per la prima volta la luce. I limiti posti alla nostra raccolta non permettono di darle quella estensione di cui sarebbe capace per la fertile vena de' Poeti nostri vernacoli, fra' quali merita il sig. Bada distinto posto, siccome scrittore di gran numero di componimenti, di un intero Poema, *lo Scaramuzza*, e di annui Pronostici che vengono avidamente letti in questa sua Patria.



78

IL RITRATTO DELL' AUTORE

Nè piccolo, nè grandò ; ma scarmeto ;
Fronte avertò , ochi mori e barba folta ;
Bela coa de cavei , siben incolta ;
Longa oto quarte , e de color bruneto ;

Che in Venezian sa far qualche Soneto ;
Ma de quei da dozena e da racolta ;
Che à composto el Baracola una volta ;
E tre o quatro Poemi in sto dialeto ;

D' umor alegro ; amante del chiassar ,
Colerico a le volte , ma co gnente
Facile da poderse mo voltar ;

Pien de sincerità , che stoicamente
De viver po ghe piase e de tratar ;
Sora tute le cosse indifferente :

Del Soneto presente

Questo, Siori, è l' autor. Dèghe un' ochiada ;
Che l' è deposta Zambatista Bada .

L' ADDIO

Za che , per bontà vostra ; soñ costreto .
 De doverve lassar , anema mia ,
 Permetème un adio co sto Soneto
 Che l' ultima vorè fursi ch' el sia ,

Sapiè peraltro che tranquilo e lieta ;
 Cara , dal vostro fianco vago via ;
 Che se ò da dir el vero mi , in efeto
 Gera stufo de starve in compagnia .

Nè ve aspetessi mai , che con impianti
 Ve vegnisse a zurar d' aver gran pena
 Nel doverve lassar come fa tanti ;

Perchè Amor m' à ligà d' una caena
 De quele che in tragedia i comedianti
 Adopera de lata in su la scena .

LE DISGRAZIE

Se vago per trovar un amalà,
 L'è andà fora de casa, el xe guarlo;
 Se, piovendo, d'ombrela son munio
 Porto un intrigo, che bon tempo fa;

Se col caldo vestir me vò da istà,
 Fa fredo un ora dopo e m'ò sfredio;
 E se de star in quiete ò stabilio
 Son da diese persone tormentà;

Se vago in Piazza perdo el fazzoletto,
 Ogni cossa che compro i me la sprezza;
 Machio el tabaro el primo di ch'el meto;

Son fortunà in amor co l'oridezza;
 E se voggio frezzar un bel viseto;
 Cupido no à per mi nissuna frezza.

NATURA DI AMORE

Se credesse col tempo d' arivar
A posseder quel cuor che m' inamora;
Ghe voràve el mio afeto tributar,
E assae felice mi saràve allora .

Ma come no me posso lusingar
D' aver mai tanto ben da una signora
Che se vede da molti a cortegiar,
Cussi a sto mio pensier dago un dessora .

Me sento, se volèmo; del brusor,
Ma spero che nol faccia in mi magagna
Pensando ai tanti che ghe fa l' amor .

Perchè la dona infati xe compagna
Del fogo, che perdendo va el calor
Quando in piccole bronze i lo sparpagna .

LA CORRISPONDENZA

Un fogio t'ò mandà ; Betina cara ;
Nel qual mi te parlàva de l' amor
Che porto al to' museto , e de l' ardor
Che m' à impizzà la to' bellezza rara ;

Ma ti , cagnazza , a la mia pena amara ,
Mentre che mi tuto te dago el cuor ,
D' una letera toa darne l' onor
Gnanca ti vol ? Oh ti xe pur avara !

Un fogio too lo pagheria un zechin ;
E lo conserveràve , tel protesto ,
Come una zogia sempre nel borsin ;

Se contentar no ti me vol mo in questo ,
Tornime donca el mio , che , poverin ,
Farò eh' el serva per furbirme el cesto ;

INVOCAZIONE

O *Musa, tu che di caduchi allori
 Non circondi la fronte in Elicona;
 Ma che sempre ti è stada mia parona
 Impartindome spesso i to' favori;*

*Le donne, i cavalier, l'armi, gli amori
 Per acquistàr d' aloro una corona
 Mi no voggio cantar, bensì a la bona
 Un Soneto acozzar senza suori.*

Dame donca el to agiuto sta matina
 Aciò possa sortir da l' imbarazzo,
 Che in sacco mi no go tanta farina.

Perchè ti à da saver che conto fazzo
 De lodar sior Girolamo Sorina,
 Nè se sa cossa dir d' un vis . . .

I. CANZONETTA

Me sento una smania,
Me sènto un brusor
Nel cuor, ne le vissere
A darne dolor.
Procuro l' origine
Saver de sto mal,
No arivo a comprender
La causa fatal.
Ch' el fio mai de Venere
M' avesse ferio?
I dise che perfido
Xe in fati quel Dio;
Ch' el solo so' studio
Xe tesser ingani
Per veder i omeni
In pianti, in afani.
Ò visto una femena
Un di d' accidente
A un logo che pratico
Sentarmese arente;
Con tuta modestia
Discorso ò con ela;

E ò visto con genio
 Che assae l'era bela .
 M' à piasso l' amabile
 Grazioso so' far ,
 M' à piasso el melifluo
 So' dolce parlar .
 Ah sì ! senza dubio ,
 Cupido xe questo
 El qual con insidia
 Colpir m' à volesto .
 Epur gera solito
 Vantarme che Amor
 No à mai possù iluder
 El sciolto mio cuer .
 Aimè ! tropo incauto
 Vantava sto ben ;
 E lu , tuto invidia ,
 M' à dà sto velen ;
 Velen che ne l' anema
 Me dà gran tormento ,
 E sempre più a cresser ,
 Meschin , me lo sento !
 Con ela trovandome
 El sangue m' impizzo ,
 Patisso a no vederla ,
 M' arabio , m' istizzo ;
 Oh Dio ! se la barbara
 No sente pietà ,

De mi miserabile
Mai cossa sarà ?
Se mai per disgrazia
Quel cuor xe ritroso
Finio go de viver,
Mi moro rabioso .

II. CANZONETTA

Amor, Nina, me stuzzega
Perchè continua a amarte,
Ma el to' contegno; o barbara;
Me stimola a lassarte.

El to viseto amabile
Per mi xe una magia,
Ma quel to' cuor volubile
Xe pien de tirania.

Incanta el to gran spirito,
Le paroline e i vezzi,
Ma chi pol mai resister
Ai tanti to' disprezzi?

Per ti d' amor zavario,
Ma senza compassion
Ti tuto a l'incontrario
De mi ti fa sbolzon.

Ti fa de mi un redicolo
Che tropo xe indiscreto,
Epur senza dolermene
Sofrirlo me assogeto.

Me bastaria sensibile
Trovarte al mio dolor,
Ma co tut' altri prodiga;
Che a mi, ti xe d' amor.

A Nane , a Checo , a Momolo
 Ti fa tanto de ciera ;
 E mi , più che te cocolo ,
 Più ti me trati altiera .
No gaverò quei meriti
 Che ga fursi sti siori ,
 Ma in sen go un cuor che spasema
 Per ti più assae de lori .
Ghe cedo anca in politica ,
 Che l' adular detesto ,
 Ma in fedeltà li supero ;
 Ch' è 'l più de tuto el resto :
E se no son un zovene
 De quei de primo pelo ,
 No son po' gnanca un vechio
 Da farghene bordelo .
Vedi chi donca merita
 Da ti la preferenza ;
 Se quei che xe più zoveni
 O quel che à piü prudenza .
Ah , Nina mia , rissolvite ,
 No farne più penar ;
 E no redurme al merito
 D' averte da lassar .

III. CANZONETTA

Nineta ; el cuor me bagola
 Da l'alegrezza estrema ;
 E tanto son estatico
 Che d'insognarme ò tema .
Me par squasi impossibile
 D'esserte al fianco ancora ;
 Dopo d'averte , incauto ,
 Lassà per mia malora .
No gera mai credibile
 Che dopo un abandon
 De tanto lempo , a dirtela ;
 Trovasse compassion .
Epur ; Nineta amabile ;
 Scordando el mio traviar ;
 Ti ga pietà d'un misero ,
 E ti lo torni a amar .
Pazienza , se contrario
 Me gera prima Amor ;
 Se tanto ancuo propizio
 Lo trovo a mio favor .
Za no poteva vederme
 Al fianco de nessuna ;
 El che xe stà preludio
 De tanta mia fortuna .

Ma la fortuna è instabile ;
Nè dura sempre el ben ;
E no voria che 'l netare
Cambiasse po in velen .

Temo che ancora l' anema ,
Cara Nineta mia ,
Come ti vantì , libera
Del tuto , oimè ! no sia ;

Temo un amor residuo
De quel che ancuo ti abori ;
Perchè a parlar ti esageri
Co' d' elo ti discori .

Nineta , no te ofender
De sto mio van sospeto ,
Perchè el timor de perderte
Xe prova del mio afeto ;

E quel amor conservime
Che ti me mostri adesso ,
Che mi , cara mia cocola ,
Con ti farò l' istesso .

IV. CANZONETTA

Nina , intendessimo
 Senza far scene .
 Per ti più viver
 No voggio in pene .

Zozo dei bazari
 Me va l'amor ;
 Me costa el perderte ,
 Ma ghe vol cuor .

Quel sempre in colera ,
 Sempre in barufa
 Vol chiaro esprimer :
De ti son stufa .

Vedo benissimo
 Che un altro ogeto
 T' occupa l'anema ,
 Lo vedo schieto .

Mi no go meriti
 Per impegnarte ;
 No son melifluo
 Per cocolarte ;

Son omo ingenuo
 Nel mio tratar ,

No go politica
 Per adular.
Ti pol, volendolo,
 Conosser ben
 Se un cuor sensibile
 Mi gabia in sen.
Ma a certe smorfie
 D'adulazion,
 Per mia disgrazia;
 Nò, no son bon.
Fazzo el possibile
 Per darte prove
 D'amor, ma è inutile;
 Gnente te move.
Donca lassessimo
 Senza sussuri,
 Senza altre colere;
 Nè musì duri.
Questo sia l'ultimo
 Dei mii lamenti,
 Sia questo 'l termine
 Dei mii tormenti.
A quello atachite
 Che più te piase;
 E Tita lassalo
 Almanco in pase.
Ma senti, o barbara,
 Vegnirà un dì

Che ti à da pianzer
Fursi per mi .
Ti à da conosser,
Crudel ! e presto
Cossa sia perder
Un omo onesto .

V. CANZONETTA

Mai più no voggio femene
Tratar in avegnir;
Le ò conossue per pratica,
E tropo delirante
Ò avudo da sofrir
Straniezze tante.

Vedo in ancuo benissimo
Come in amor fortuna
Ghe vol, più assai che meriti;
E i poveri Poeti
Mai no ghe n' à nissuna,
I xe negleti.

Ò fàto ogni possibile
Per cativarme el cuor
De qualche dona amabile;
Ma sempre fiasco ò fàto.
Ergo per far l' amor
Mi no son nato.

Per quanto che m' examina
No so d' aver pecai.
Sempre costante e ingenuo
Ò conservà el mio afeto,

- Nè in gnente à mancà mai
 El mio rispetto ;
 Aver de l'antipatico
 No credo certamente ;
 No son un omo vechio ,
 E in qualche congiuntura
 Posso discretamente
 Far figura .
- No son tanto melifuo ;
 Lo acordo , nel' parlar ,
 Ma se me vede l'anema ,
 Ma se me leze in cuor
 Che so anca m' gustar
 Un vero amor .
- No son el sior Cristofolo .
 Che manierete afeta ;
 Ma so anca mi benissimo ,
 E senza esser secante ,
 Dir qualche paroleta
 Insinuante .
- No go certa politica
 Per insensar , è ver ;
 Ma questo no è demerito ,
 Che xe anzi da stimar
 Quel omo che sincer
 No sa adular .
- No son de viso palido ,
 Come voria Marieta ,

Ma gnanca esser un etico
 No brameria per questo ..
 Ò sanità perfeta
 E vaga el resto .

Teresa mo me tacìa

Che pecco in gelosia ,
 Ma come xe possibile
 Che un omo voglia ben ,
 E indifferente sia
 A quel che vien ?

El far da secondario ,

El far da stropabuso ,
 Mai no m' à piasso, a dirvela ;
 Son facile e indulgente ;
 Ma questo lo recuso :
 O solo, o gnente .

Dise la siora Malgara :

No se comanda al cuor ,
 Ma xe le sole bestie
 Che senza riflessione
 Segonda , più che amor ,
 La so' passion .

La Nina xe insensibile

Al mio sincer afeto .
 A letere de scatola,
 Perchè no resta iluso ,
 La me l' à dito schieto
 In sul mio muso .

Dirò : che ño me merita
Chi donca no me vol,
E cercherò passarmela
Con qualche bon amigo;
Ma un pochetin me dol,
Sincero el digo .

VI. CANZONETTA

Che Berta filava
 El tempo è passà .
 Nineta , t' amava ,
 Che ben ti lo sa .
Mia sola ti geri .
 Sovrana del cuor ;
 E voti sinceri
 Te ofriva de amor .
Ma mai ti à volesto
 L' oferta gradir
 D' un cor fido e onesto ;
 Nè afeto sentir .
Repulse e dispreggi
 Mi aveva da ti .
 Adesso i to' vezzi
 Fa fiasco con mi .
Felice e contento
 Adesso mi son ;
 Per ti più no sento
 Nessuna passion .
Ti è cara , ti è bela ,
 Nol posso negar ,
 Ma più no ti è quela
 Da farme inzuçar .

Confesso, che amiro
 Quel vago visin,
 Ma più no sospiro
 De starte vicin.

Cupido m'aveva
 Ferio col so' stral,
 Ma po' che me greva
 De lu saria mal;

Vedendote tropo
 Tirana con mi,
 Savesto l' à dopo
 Ferir anca ti;

E mentre ferio
 L' à aponto el to cuor,
 Mai più no ò sentio
 Nel sen del brusor.

Adesso son duro,
 Ressisto a ogni stral;
 Ò el peto ch' è un mure
 D' un antemural.

I vezzi, mia Nina,
 L' ochiae, l' espression,
 Sparagna, carina;
 Per ti più no son.

VII. CANZONETTA

Poveri omeni!
 Se fido amor
 Sperè da femene
 Se' in gran eror.
Tuto el so' studio
 Xe d'inzucarve
 E torse el bagolo
 Po' de burlarve!
Le xe bisbetiche
 Nel so' pensier;
 Con ele el merito
 No serve aver.
Sol per capricio
 Le ve acarezza,
 E senza causa
 Le ve desprezza:
Mile le esagera
 Promesse avanti
 D' amor e cetera
 Coi so' galanti;
E po', stufandose
 De la persona;
 Senza demeriti
 Le ve abandona!

No è tanto instabile
Fortuna e Mar
Come la femena
Nel so' variar .

I sacrificj
No serve a gnente,
Nè mai d' un misero
Pietà le sente .

L'ardito , el stolido
Xe preferio ,
E l' omo docile
Vien avilio .

E mi per pratica
Lo posso dir ;
Nineta barbara ;
Senza mentir .

Ma con ti inutili
Xe i mii lamenti ,
Anzi ti giubili
Dei mii tormenti ;

E ti vol vederme
Un zorno o l' altro
Morir da rabia ,
Crudel ! senz' altro .

VIII. CANZONETTA

Pentio d'aver incauto
 Abandonà el to amor ;
 Mi me sentiva a struzer
 Da smania , da dolor ;
E me credea , tornandote
 El cuor a tributar ,
 D'aver la quiete a l'anema
 Ancora da tornar ;
Ma invece son più misero
 De quel che gera in prima ;
 Più no me posso iluder ,
 De mi no ti fa stima ;
No trovo quel sensibile
 Che pur ti vanti in ti ;
 El mio servir xe inutile ,
 No gh'è pietà per mi ;
E sol ti godi a vederme
 Cascà come un cocal ,
 A sospirar , a pianzer
 El mio destin fatal .
D'un cuor , che pur è docile ,
 Volesto ti à trionfar ,
E renderlo ridicolo
 Del proprio so' penar .

Ti me vol dar da intendere
Che no ti ga altri amanti ;
Ma no son mato a crederte ,
Come che gera avanti .

Ti ga , cussi no fussela !
El caro to' Tonin
Che tute l'ore assiduo
Te sta sempre vicin .


Lo vedo ch' el te cocola ,
Che ti ghe porti afeto ;
Mi mai te vago a genio ,
Tratà son per dispeto .

No posso star nn atomo
Con ti da solo a sola ;
Nè senza testimonio
Te posso dir parola :

Per elo no te stimola
Inutili riguardi ;
Per mi è delito massimo
Se apena ti me vardi !

Ah Nina , no son semplice ,
Capisso chiaramente :
Tonin xe el to' bel idolo ;
Mi son un biltri , un gnente !

NOVELLETTE



L' OSSESSA

Una fa d'un vilan, che no gaveva
Che disdotò vint' ani, alquanto bela
Ma un pocheta compieta,
Patia le convulsion, e povereta
Co ghe vegniva el mal ela faceva
Dei moti convulsivi e stravaganti
Che meteva paura ai circostanti.
In un dì del so' mal, disea sti tai:
Questi è moti da veri indemoniai;
Oh povera putela
La fa pecà; vardèla
Se no l'è spiritada?
Senz' altro sta ragazza è indemoniada.
Oh come la se trà
Meschina qua e de là!
Come la ciga forte!
La ga le carne morte,
Ossesta l'è seguro,
La dà la testa al muro,
La fa mile sberlefi;
Oh Dio, che bruti cefi!
Senti La se lamenta;
Un diavolo seguro la tormenta.

Essendo allora in Settimana Santa ,

Quela zente à deciso tuta quanta ,

Che a Venezia la fusse da menar

Per farla el Zoba Santo sconzurar :

Eco donca che in bota

Qua a Venezia i l' à condota .

Apena in Chiesa de san Marco è entrada

Sta povera supo la spiritada ,

Per delirio fatal ,

Ghe xe vegnù el so' mal ,

E a cigar la s' è messa ,

Cussichè tuti l' à credesta Ossessa

Uno che sapia sconzurar ghe vol ,

Et eco Piero Samo Barcarol ,

Che a forza de cigar

Se pretendeva i diavoli scazzar .

Avicinà elo donca a la ragazza ,

A dito : Poverazza !

Questa xe , no gh' è dubio , spiritada ;

E fandoghe la crose el l' à segnada ,

Disendo : Fora , fora

Da la parte de Dio

Scelerato demonio iniquo e rio .

Ma sta ragazza ancora

La urlava , la cigava ,

Che compassion la fava ,

E sempre el Barcarol con santo zelo

Cigava : Fora , fora

In to tanta malora
Scelerato demonio iniquo e felo;
 E andava via tocando
 La puta qua e de là de quando in quando.

E per qualche momento

L'è andata in svenimento;
 El che la fava creer liberada,
 Ma gh'è dà l'Esorcista una vardada,
 Disendo: No xe ver,
 La lo ga in corpo tuto quanto intier.
 E parlando a quel diavolo con sdegno
 Gh'è dito: Vogio un segno;
 Ti me vol cogionar ma no te credo;
 No son minchion, e vedo
 Che in sto corpo ti è ancora;
 Onde presto va fora,
 E dame avanti un segno
Scelerato demonio iniquo e indegno.

In quello dal sopor

La s'è come svegiada, ma in furor,
 Dando un pugno a sto tal tanto potente
 Che ga fato saltar de boca un dente;
 E co sto segno allora,
 El diavol no, ma el dente è vegnù fora:
 El creder a sti Ossessi veramente
 No xe degno del secolo corente,
 Ma un'ignoranza crassa
 Ancora resta ne la zente bassa.

IL TUTORE

Un Tutor avea l' entrae
 Del Pupilo consumae .
 In giudizio a render conto
 L'è chiamà circa sto ponto :
 El Pupilo , che à cità
 Sto Tutor , cussì à parlà :
 Mio sior pare m' à lassada
 Una bela e grossa entrada ;
 El Tutor , ch' è qua presente ,
 M' à ridoto senza gnente ;
 Fazzo istanza aciò me sia
 La mia roba risarcia .
 El sior Giudice (parlando
 Col Tutor) dise : Comando
 Presentar vu al mio Ministro
 Ogni libro de registro
 De l' Ussida , e de l' Entrada ;
 Che ogni cossa sia incontrada
 Per poder con fondamento
 Dar giudizio in sto argomento :
 Tuto inteso dal Tutor ,
 Trando a parte ogni rossor ,
 El s' è messo in zenochion

Dimandando compassion
Con el dirghe: Ve protesto
Che altro libro no ò che questo
Che ve mostro: Ecolo quà.
E la boca el gh' à mostrà,
Sogiungendo, che l' Entrada
Per de là gera passada;
Po voltandoghe el da drio:
Per de qua tuto è sortio,
E se vede dal bilanzo
Che no gh' è gnente d' avanzo.
Mal apena che l' avesse
Elo infati le braghesse
Per el capo soo più bon;
Tanto el gera crapulon!
Quando tuto è consumà,
Adio conti: xe saldà.

IL PORCO

A Mestre un benestante
 Un bellissimo Porco avea arlevà
 Che gera de grandezza esorbitante:
 Un certo so' vicin, che avea osservà
 Sto famoso anemal,
 Ga dito un dì a sto tal:
 Compare, avè un Porcelo
 Che xe una maravegia, grasso e belo.
Ma l'altro ga risposto: Amigo mio,
 Cossa serve che belo e grasso el sia
 Se quando lo averò destrubùo,
 La mancò parte la sarà la mia?
 A mie sorele Muneghe
 Ghe ne vol una parte, un' altra al Medego;
 Un' altra a sior Piovan;
 Un' altra a mio Zerman,
 Un' altra a mia Cugnada;
 E po roba salada
 Da dar a questo a quello;
 Cussichè posso dir: Adio Porcelo:
 Se sapesse trovar qualche pretesto
 Per scansarme da tuti, oh ve protesto
 Che molto volentiera lo faria,
 E tuto quanto mi mel magneria.

L' amigo ga sogionto: Donca mi
V' insegnerò el secreto; fe cussi;
Via da de qua mandèlo,
E a chi domanda: Dov' è andà el Porcelo?
Diseghe: El me xe stà
L' altra note robà,
E cussi sarè esente
D' averghe da dar gnente.

Bravo! sior sì, pulito
(Quello dal Porco à dito)
Me piase l' invenzion
E darò a sto ricordo esecuzion.
Ma ne la note drio da la so' zente
L' amigo del consulte bravamente
Ghe lo à fato robar,
E in un paese più lontan mandar.

Co la matina è stada;
I s' à incontrà un e l' altro su la strada;
E quello dal Porcelo
À dito a l' altro: No savè, fradelo;
Che i m' à robà da seno el Temporal?
Co la boca ridente
Ga l' amigo risposto: Tal e qual
Avè da far aponto co la zente.
El primo mo zurava e sprezurava
Ch' el Temporal, pur tropo, ghe mancava.
Tralassè de zurar,
À replicà el segundo, che l' afar

So anca mi come l'è, che, amigo mio;
Son quel ch'el stratagema à sugerio;
Peraltro questo è 'l modo
De far parer che vu parlè sul sodo:
À tornà da recaò quel dal Porcelo
A replicar: Credèlo,
No la xe un'invenzion, la è tropo vera,
I m' à robà el Porcel geri de sera.
E l'altro à replicà medemamente:
Bravo, amigo, ma bravo veramente,
Seguitè pur cussi, che ve protesto
Per vero el caso vegnirà credesto.
Tornava el primo a protestar zurando,
Ma st'altro allora è corso via ridando.
Pol la fiaba avertir,
Non ti fidar che non sarai gabbato,
Ma la pol anca dir:
Chi cerca d'ingannar resta ingannato.

I DUE ORBI

Xe passà un morbinoso verso sera
 Per san Filippo-Giacomo,
E sul ponte ghe gera
 Do' orbi che cercava la limosina.
El xe andà rente a quei,
Disendoghe: Fradei,
Tolè sto mezo talaro,
In pase dividevelo
E recitè el Rosario
 Col Deus in adiutorio
 Per l'anime del santo Purgatorio.
Ga dito l'un e l'altro: Dio ghel merita:
E dite ste Orazion i s'è pensai
 D'andar a l'Osteria, e presto i xe passai
A quela del Salvadego,
E i s'à fato portar
 Da beber e magnar.
I xe vegnui po al ponto
 Che più interessa, de pagar el conto;
E questo à dito a quello:
Vu che avè el mezo talaro, paghèlo:
Ma l'altro allora ga risposto; vu
 Paghèlo, che se' quello che l'à bù.

A replicà el secondo: Mi no posso
 Pagar, quando se' vu quel che l' à scosso.
 Mi no go scosso gnente,
 À tornà a dir el primo francamente.
 E st' altro allora à dito: Se' un bricon
 Che me voria trufar. Vu, se' un ladron,
 À soggiunto quel' altro, ma no mi.
 La v' à dita cussi,
 À tornà questo a quello replicar.
 E a forza de incalzar.
 Ingiurie sora ingiurie i xé arivai
 Che i se xe bastonai.
 Per meterghe de mezo è corso l' Osto,
 E infati el gh' è riussio, ma a proprio costo;
 Che anca a lu gh' è tocae
 Oto o diese legnae.

I Orbi à capio dopo
 Come quel tal li avea burlai pur tropo,
 Onde a l' Osto i ga dito: Pagheremo
 El primo dì che nu se vederemo;
 E l' Osto, omo discreto,
 À ridesto a sta cossa e à tirà dreto
 Mi no aprovo quel scherzo.
 Che in dano a ridondar vegna del terzo:

IL PODESTA'

Terminà el Regimento, a un Podestà
 Ga fato da un ragazzo la Cità
 Recitar in latin un' Orazion :
 Ma lu gera un c
 Che no capia el latin ;
 L' avea però vicin
 El Cancelier che molto lo intendea ,
 E a lu l' à dimandà , cossa che avea
 Dito el ragazzo in pien
 Con quela so' Orazion .
 Rispostó à el Cancelier , che in conclusion
 Le lode la contien* .
 De la so' casa . Infatti
 Per casa elo intendea i so antenati ;
 Ma el Podestà à capio tuto a roverso ;
 E credea viceverso
 Che l' intendesse del Palazzo dir ,
 Fato da lu de novo costruir .
 Fenia po l' Orazion , dal Podestà , .
 Per basarghe la man , el puto è andà ,
 E a questo lu ga dito :
 Amigo , ve ringrazio che pulito
 Avè dà de le lode a casa mia ,

Ma bisognà averia
Che visti avessi tuti i mii mezaì
Che ò da novo adobai,
Mentre seguro vu
Averessi podesto dir de più .
E questi gera quei
Che andava a governar Cità e Castei .

IL PAPAGALLO

Aveva un Papagà
 Una Dona comprà,
 E questo ghe servia
 De distrazion qualche ora e compagnia:
Col tempo gera bon
 La lo tegnia al balcon,
 E ripeter la ghe fava
 Quele parole che la ghe insegnava.
Un Medego passava
 In quello che insegnava
 Al piccolo anemal
 Parole, giusto el solito, sta tal.
Ti è beco, ghe disea
 La Dona; e ripetea,
Ti è beco, el Papagà;
 E 'l Medego a sentirlo s'è fermà.
Vedendo ela el Dotor
 Fermà, ridea de cuor,
 Pensando ch' el credesse,
 Che a lu el se Papagà, *beco* disesse.
El Medego mo acorto,
 De questo s'è inacorto,
 E co le quiete allora
 A dito francamente a la Signora;

Parona, vu ridè ;

Ma no savè 'l perchè

Beco el me diga ; ond' eco

A dirve mi perchè 'l me chiama *beco* :

El tien elo in pensier

Che vu siè mia Mugier.

Co sta so' bizaria

L' à tratada el Dotor da buzevia.

Qualche volta è pungente

Anca el scherzo innocente.

L'ASINÒ

Un Contadin da un so' Compare è andà
 A ricercarghe in prestio el so Somaro
 Per andar al Mercà;
 E l' altro dito ga: Compare caro,
 Mi volentiera ve faria el piaser,
 Ma con mio despiaser
 No ve posso servir, che a un mio vesin
 L' ò dovudo imprestar
 Per andar al Molin.

In sto mentre mo l' Aseno a ragiar
 Se è messo a una maniera
 Che à fato ben capir che in stala el gera.
 Come ò da creder mai, Compare mio,
 El primo à replicà, co' l' à sentio
 Mo l' Aseno a ragiar, che veramente
 Lo abiè imprestà a nessun, quando el se sente
 Anzi adesso a ragiar? L' altro à sogionto:
 Oh la sarave bela che in confronto
 De l' Aseno, Compare, me metessi,
 E che piutosto a lu che a mi credessi!
 No ocore replicar
 A l' omo che servizio no vol far.

IL GARZONE FURLANO

Tre zoveni bizari avea osservà
 Che un Furlan per Garzon a un' Osteria
 Da pochi zorni gera stà impiegà;
 E in testa gh'è vegnù sta bizaria,
 D' aspetar ch'el paron fusse lontan
 Per far' una burleta a sto Furlan .

Entrai ne l' Osteria donca al Garzon
 I à dito , de voler lori disnar ;
 E lu li à ben servii con atenzion ;
 Perchè i avesse contenti da restar .
 Infatti à magnà questi a crepapanza
 Senza , per cussi dir , che roba avanza .

Portà po el conto , uno de lori à dito ,
 (Siben ch' el conto fusse assae indiscreto)
 A sto Garzon : Ti n' à servio pulito ,
 E se vede de più che ti è discreto ,
 Donca è dover pagarte intieramente ,
 Anzi la bonaman donarte arente .

E tolta in man la borsa à fato veder
 Che l' avea dei zechini e dei ducati ,
 Disendo : Amici , no vorè recreder
 Che mi paga per tuti , perchè infati

Toca pagar a mi, mentre a disnar
 L'altro zorno son stà senza pagar :
Sior no, el segundo à dito, no convien ;
 Nè mai permeterò che vu paghè ;
 Avè pagà altre volte, e no va ben
 Che sempre a l' Osteria ne superchiè :
 El terzo francamente à po sogionto :
 A mi toca a pagar, amici, el conto ;
Ò magnà a vostre spese i di passai,
 E dopo tante volte toca a mi .
 El primo respondea : No sarà mai ;
 E questionando i andava via cussi :
 Infin quel' altro à dito : La question
 Decida donca, amici, sto Garzon .
E voltandose a lu : Caro fradelo ,
 Fenissi ti sto afar ; te benderemo
 Col fazzoletto i ochi , aciò che quello
 Che ti ti chiaperà, mentre saremo
 Intanto qua aspetando quieti e muti ,
 Abia elo solo da pagar per tuti .
Persuaso el Garzon , senza rifleter
 A quel che podea nasser , e ch' è nato ,
 S' à lassà ai ochi el fazzoletto meter ,
 E mentre ch' elo andava via de fato
 Cercando qua e de là chiapar qualcun ,
 Da l' Osteria bel belo è scampà ognun .
Xe arivà in quel momento el so' Paron ,
 Che gnente no saveva de sto afar ,

Urtando senza acorzerse el Garzōn ;
El qual mo suponendo de chiapar
Un de quei tre , ga chiapà aponto lu ,
Disendoghe : Pagar ve toca a vu .

Oh pofardio ! crederò ben de sì ,
Informà de la cossa , à dito l'Osto ,
Che pagar , sior minchion , me toca a mi .
Vostro dano , mi gaveria risposto :
No bisogna fidarse dei Garzoni ,
Ai negozj à da tender i Paroni .

IL MEDICO

Se trovava in Bassan
 Un omo morbinoso e cortesan
 Che aveva el naso estremamente grando ,
 Che a quanti lo vedea
 Maravegia grandissima el facea .

Un dì , che caminando
 L'andava per Cità ,
 Un Dotor l' à incontrà
 A caval d' una mula , che fermada
 In mezo de la strada
 No volea caminar
 Per quanto ch' el Dotor tentasse far .
 Onde , cussi scherzando ,
 Ga dito el morbinoso (recordandose
 De aver el naso grando)
 Seu vu , Dotor , o xe la mula , a caso ,
 Che se faccia paura del mio naso ?

El Dotor gera anch' elo
 De bizaro cervelo ,
 E risposto imediate el ga cussi :
 Credo infati esser mi
 Quello che s' à ispaurio ,
 Che me sento un prurito in tel da drio .
 L' omo che vol scherzar
 Anca lu deve el scherzo tolerar .

IL VENTO

In un certo Casin de compagnia
 Una ventosità bela e sonora
 À trato una Signora .
 E sicome diversi l' à sentia ,
 Ghe xe vegnù , ch' è natural , sul viso
 Do' rossi a l' improvviso ;
 Ma suponendo de poder far creder
 Che fusse stà el strissar del careghin
 Che la gera sentada , e no el martin
 Che à sonà la trombeta ,
 La andava via movendose ,
 Strissando el careghin , malizioseta .
 Ma morbinoso el Cavalier servente ,
 Che ghe gera d' arente ,
 Gh' à dito : La pol far
 Cussì quanto ghe par ,
 Ma mai la ariverà
 A far come che prima fato l' à ;
 E à savesto la cossa in sta maniera
 Anca quei che inacorti no se gera .
 Per voler ocultar certe cossete
 Più in vista le se mete .

LA CODA RECISA

Un Zovene una volta se trovava
 In palazzo a san Marco, dove i fava
 El placito d' un tal che avea scanada
 Un' infelice Dona sfortunada;
 E come ne la calca de la zente
 Se trova anca dei ladri, da prudente
 L' à assicurà i relogi, avendo messe
 Le do' caene drento in le braghesse;
 E stando co le man ne le scarsele
 De la velada, custodiva in quele
 Do' fazzoli, un bianco, un de color,
 E ascoltava tranquilo l' Orator.

Un Putazzo, che a lu gera vicin,
 À dito verso un altro: Saveu quanti
 In sta sala birbanti
 Vien per robar i fazzoleti, e fin
 Anca relogi? Stassela pur là,
 L' altro risposto ga:
 Ma tanti anca ghe xe che vien a far
 Baronae d' altro andar:
 A un Signor, giusto geri,
 No so se vu ghe geri,
 I gh' à tagià la coa
 Longa sie bone quarte, e tuta soa;

Che no ve digo gnente
Quanto l'era furente !
El Zovene , sentio sto tal raconto ,
Che anch'elo avea una coa de qualche conto ;
Per poderse salvar anca da questo ,
Da la scarsela à tirà fora presto
Una man , e s' à messo
La coa davanti , e nel momento istesso
L'è tornà co la man ne la scarsela ,
No l' à trovà più in quella
El fazzoletto che ghe gera avanti ,
Che robà ghe l'avea quei do' birbanti .
Sorpreso l'è restà , ma l' à ridesto ,
Perchè infati da rider caso è questo .
Gh'è certe baronae
Che anderia , son per dir , squasi premiae :

IL CONTADINO E L'ASINO

Andava un Contadin con un so' fio
 Una volta al Mercà,
 Un Aseno menando co eli drio.
 Alcuni che per strada li à incontrai
 Ghe disea: Mo che alochi se dà mai!
 Mentre un Aseno i ga
 Da poderghe a cavalo su montar,
 I se sfadiga invece a caminar.
 El vechio, sentio questo,
 De l'Aseno a cavalo è montà presto,
 Ma strada po facendo
 Ghe andava de le femene disendo:
 Oh che vechio indiscreto!
 Lassar che quel ragazzo, povereto,
 A pie ghe cora drio;
 E lu desmonta e fa montar so fio.
 Ma fati cento passi mal' apena
 Dei vechi ghe tentena,
 Come gera vergogna che un putazzo,
 Che bone gambe avea per caminar,
 Se facesse da l'Aseno portar,
 E ch' el vechio gramazzo
 Andasse a pie. El vechio donca anch' elo
 A caval xe montà del Somarelo;

E allora tuti s̄comenz̄ava a dir :
 Povera bestia i la vol far morir !
 Nè savea , poverin ,
 Come più regolars̄e el Contadin :
 Da l'altra parte ghe premea che l'Aseno
 Fresco al Mercà arivasse , onde el se imagina
 De ligarghe le gambe , e a picolon
 Portarlo , pare e fio , con el baston .
 A sta scena redicola
 Lo fischiava la zente ,
 Disendo : Bel agnelo veramente
 Da portar col baston ! E desperà ,
 À dito el Contadin : No ghe sarà
 Maniera donca de poder far taser
 Le male lengue ? co la sia cussi
 Sarà meglio che mi
 Fazza come che vogio a modo mio ,
 E che i me teta pur in tel da drio .
 Onde l'Aseno allora desligà
 Caminar come prima el l'à lassà ,
 Senza più mai badar
 De la zente molesta el chiacolar :
 No badar a maligni nè a ignorantì ,
 Fa ben , e lassa dir a tuti quanti .

IL POSTIGLIONE

Una Munega in vila questuando
 Andava qua e de là col Somarelo;
 Formento e sorgo-turco dimandando
 Per el proprio Convento a questo a quello:
 À dà la bestia un forte scapuzzon
 E xe cascada in tera a tombolon:

La Madre reverenda;
 Che gera imbarazzada a sta facenda,
 Compassionava el povero anemal
 Col dir: Meschin te xestu fato mal?

*Levite suso via,
 Povera bestia mia.*

Nè l'Aseno levava
 E la Munega ancora replicava:

*Levite suso via,
 Povera bestia mia;*

Ma manco quela bestia se movea:
 E la Madre da novo ripeteva:

*Levite suso via,
 Povera bestia mia;*

Levite su, la ghe diseva ancora;
 Ma no levava l'Aseno gnancora.

Xe passà in quel momento un Postiglion,
 E la Munega vista in sta funzion

Gh' à dito: Madre, la me lassa far
A mi che suso lo farò levar;
La osserva el bel secreto
Che deve far l' efeto .
E tolto allora in man un baston grosso
Gh' à dà diese legnae zo per el dosso,
Bestemiando a la solita so' usanza .
E l'Aseno po allora con creanza
In pressa è levà suso ,
Da gentilezza tal tropo confuso ,
E persuaso apien
Che a retorica tal ceder convien :
 Se vince col baston ,
 Se le bone no val , l' ostinazion :

IL CIARLATANO

Ghe gera un Zaratan che nel contar
 Istorie dei so' viaggi avea el difeto
 De falope grandissime sbarar
 Che gnanca no se trova in Riciardeto ;

L' à pensà de volerse moderar ,
 Ordenando al so' servo per sto ogeto ;
 Che quando el lo sentisse a esagerar
 Ghe tirasse el gaban ; onde in efeto

Disendo un dì d' aver trovà un lion
 Che gaveva una coa longa tre mia ;
 El servitor gh' à dà presto un tiron ;

E lu à calà d' un mio , e andando via
 Un tirando , un calando , in conclusion
 Che l' era senza coa ghe sovegnia .

Sto tiron ghe voria ,
 Amigo , anca per vu quando parlè ,
 Perchè altro mai che slape no contè .

LA FORMICA

Un Pare coregeva el proprio Fio ;
 El qual a altro atento , che badar
 A le paterne voci , gera drìo
 Le Formigole in tera a numerar.

Cossa pensistu , à dito el Pare , mai ;
 Vedendolo aplicà coi ochi a tera ?
 Te vergognistu sì dei to' pecai ?
 E ga risposto el Fiol , ilare in ciera :

Stava , sior Pare mio , pensando suso
 Che una sola Formigola che drento
 Fusse entrada co l'altre là in quel buso ;
 La vegniva a formar le cinquecento :

Ben da questo se pol la deduzion
 Formar , quanto che i Pari sia ascoltai
 Dai Fioi , quando i ghe fa la corezion ,
 Dal paterno so' amor infervorai .

INVETTIVA CONTRO UNA VECCHIA

SONETTO COLLA CODA

DI PIETRO ANTONIO NOVELLI

FAMIGERATO PITTORE VENETO

Vechia chietina, via de qua, corbame
Scampà da sant'Arian, bruta figura,
Mumia, diavolo, can che fa paura,
Spuzzolente de vermi bulegame,

Asma, lievra, catàro, peste infame,
Bruta evacuada de Pluton pastura;
Reo spegazzo e sberlefo de natura,
Parca che de la vita taglia el stame,

Carogna, striga, anema danada,
Feral che piola, e che ga el talco sporco;
Otomia co la pele roversada,

Mozza in sconquasso, e un di nena de l'orco;
Morta vampira con un corno infada
Dei spiriti foleti dal più sporco.

Le Gree fiole de Forco
Che una co l'altra un ochio se imprestava

Gera megio de ti, che ti à la bava:

Arcibisdebisava

Ti par, co quella to ciera inumana,
Picàda e vegnua verde in tramontana;

L'avarizia te scanà,

Efige de la morte e de l'invidia,
Che ti ga propio el cefo de l'acìdia.

No gh'è ne la Numidia

Fiera più spaventosa, e no gh'è drago,
Basilisco, simioto, arpia nè mago,

Nè de Stige sul Lago

No ga Caronte quel color da mostro
Tra 'l fiel e tra 'l calizene e l'ingiostro;

Va via dal confin nostro,

Va a star co' quei che tien el colo storto,
Che a 'ochi bassi no i te farà el torto

De vardarte quel porto

De tute le disgrazie, brutto muso,
Despetoso, ingrugnà, scarnà, otuso.

Quel to vardar astruso,

Losco, incantà, che 'l sangue fa giazzar,
Che fa l'anema in corpo scantinar,

E quel gran scricolar

Che te fa i ossi, e quella lo osazza,
Che par el subio de una carbonazza,

Le xe cosse che cazza

Via la pazienza, e se se imbila e stufa
Sentindo quel fetor che ti à da mufa.

Coi zoveni in barufa

Grima; zotega, spia, nona del boja;

Goba, sdentada, secagine, incroja.

Chi vedesse despoja

Sta idea de Lazareto e de Ospeal;

Piena de fezza come un orinal,

Vederia un infernal

Furia; el Porton de casa de colù

El pecà me vien mal ...; no posso più:

*Siaci permesso di chiudere la Raccolta
colla seguente*

SALUTAZIONE A VENEZIA

*ch'è stata da incerto Autore
curiosamente scritta con parole le quali sono
ad un tempo stesso Latine ed Italiane.*

Te saluto, alma Dea, Dea generosa:
O gloria nostra, o Veneta Regina!
In procelloso turbine funesto
Tu regnasti sicura; millemembra
Intrepida protrasti in pugna acerba.
Per te miser non fui, per te non gemo;
Vivo in pace per te. Regna, o beata,
Regna in prospera sorte, in alta pompa;
In augusto splendore, in aurea sede.
Tu serena, tu placida; tu pia,
Tu, benigna, tu salva, ama, conserva.

F I N E

INDICE

LA MOMOLETA, Cantata d' Incerto Autore. pag. 9

SONETTI DI TATI REMITA:

| | |
|-----------------------------------------------|----|
| <i>Il vero Barcajuolo Veneziano</i> | 23 |
| <i>La Convenienza</i> | 24 |
| <i>L' Umanità</i> | 25 |
| <i>Il Veneziano alla Campagna</i> | 26 |
| <i>Il Poeta</i> | 27 |
| <i>La Modestia</i> | 28 |
| <i>La Testa vuota</i> | 29 |
| <i>Il vero regalo</i> | 30 |
| <i>Il vero dovere</i> | 31 |
| <i>L' Affettazione</i> | 32 |

POESIE DI GIO. POZZOBON, detto SCHIESON:

| | |
|------------------------------------------------------------------|----|
| SONETTI, Difficoltà dello scrivere vernacolo. | 37 |
| <i>Un Sogno</i> | 38 |
| <i>La Dichiarazione</i> | 39 |
| <i>La Ritrosia</i> | 40 |
| <i>Invettiva contro le Donne</i> | 41 |
| <i>La scelta della Moglie</i> | 42 |
| <i>Per Sposalizio</i> | 43 |
| <i>Disgrazie de' Maritati</i> | 44 |
| <i>Raccomandazione del Museo dell' Au- tore</i> | 45 |
| <i>Per la morte di un Figliuolo dell' Au- tore</i> | 46 |

| | |
|----------------------------------------------|------------|
| <i>EPIGRAMMI XXIV. dello Schieson.</i> | 47 e segg. |
| <i>CINGARESCA, L'ASTROLOGO, dello stesso</i> | 57 |
| POESIE DI GIAMBATISTA BADA: | |
| <i>SONETTI, Il Ritratto dell' Autore.</i> | 71 |
| <i>L'Addio</i> | 72 |
| <i>Le Disgrazie</i> | 73 |
| <i>Natura di amore</i> | 74 |
| <i>La Corrispondenza</i> | 75 |
| <i>Invocazione</i> | 76 |
| <i>CANZONETTE. VIII.</i> | 77 e segg. |
| <i>NOVELLE, L'Ossessa</i> | 99 |
| <i>Il Tutore</i> | 102 |
| <i>Il Porco</i> | 104 |
| <i>I due Orbi.</i> | 107 |
| <i>Il Podestà.</i> | 109 |
| <i>Il Papagallo</i> | 111 |
| <i>L'Asino</i> | 113 |
| <i>Il Garzone Furlano</i> | 114 |
| <i>Il Medico</i> | 117 |
| <i>Il Vento</i> | 118 |
| <i>La Coda recisa</i> | 119 |
| <i>Il Contadino e l'Asino</i> | 121 |
| <i>Il Postiglione</i> | 123 |
| <i>Il Ciarlatano.</i> | 125 |
| <i>La Formica</i> | 126 |
| <i>SONETTO DI PIETRO ANT. NOVELLI</i> | 127 |
| <i>SALUTAZIONE A VENEZIA</i> | 130 |

INDICE DE' XIV VOLUMI

CHE FORMANO

L'INTERA COLLEZIONE DELLE POESIE

SCRITTE IN DIALETTO VENEZIANO.

POETI ANTICHI

- ~~VOL. I~~ { LA GUERRA DE' NICOLOTTI E CASTELLANI DELL'ANNO 1521, Poemetto d'INCERTO AUTORE.
LA CARAVANA, Capricci d'INCERTO AUTORE.
- VOL. II { POESIE DI MAFFEO VENIERO Arcivescovo di Corfù.
POESIE DI ANGELO INGEGNERI.

POETI MODERNI

- VOL. I { CANZONETTE DI ANTONIO LAMBERTI.


- VOL. II** (**APOLOGHI E IDILLJ del Lamberti.**
- VOL. III** { **LE STAGIONI CAMPESTRI E CIT-
TADINE dello stesso .**
- VOL. IV** { **I CAVEI DE NINA DEL DOTT. MAZ-
ZOLA', Sonetti cento .**
POESIE VARIE DEL DOTT. PASTÒ.
- Vol. V** { **EL VIN FRIULARO , Ditirambo
DEL DOTT. PASTÒ .**
**LA POLENTA , Scherzo Ditirambi-
co dello stesso .**
**I OSELETI , Capriccio Ditirambi-
co DI GIUSEPPE CUMANO .**
**LA ZUCA , Ditirambo DEL CO. AB.
MARC' ANTONIO CAVANIS .**
- VOL. VI** { **APOLOGHI SCELTI DI FRANCESCO
GRITTI .**
- VOL. VII** { **IL BRIGLIADORO , Favola Chinese
dello stesso Gritti .**
**SONETTI DI BENEDETTO GIOVA-
NELLI .**
**CAPITOLO PER ACCADEMIA DEL-
L' AVV. PIETRO SALA .**
- VOL. VIII** (**POESIE DI PIETRO BURATTI .**


VOL. IX { SCHERZI POETICI DI CARLO GOL-
DONI .
CANZONETTA DI CORNELIA BAR-
BARO GRITTI , e RISPOSTA .

VOL. X { POESIE SATIRICHE DI ANGELO MA-
RIA LABIA .


VOL. XI { POESIE DIVERSE DELL' AB. ANGE-
LO MARIA BARBARO .
MADRIGALI DI MARC' ANTONIO
ZORZI .
CAPITOLO DELL' IPOCRISIA DEL P.
CACIA .
IL CIARLATANO , Novella di PIR-
RO TEOZZI .
IL BOUQUET , Canzonetta di NIC-
COLÒ PRIULI .


VOL. XII { LA MOMOLETA , Capriccio d' IN-
CERTO AUTORE .
SONETTI DI TATI REMITA (Tita
Merati) .
POESIE DI GIO. POZZOBON , detto
SCHIESON .
POESIE DI GIAMBATISTA BADA .
SONETTO DI P. A. NOVELLI .











1

1000



